

## Joaõ

### Deuxu Rybe Wihikỹ Tỹmyra, Joaõ Tyyritidỹỹdu

<sup>1-2</sup> Ibutu aõna aõnakõu, Jesuisi rarehyymy raremyhỹ. Tii rybehyymy raninira. Tii Deuxu-wana ihỹre. Ihãre tahe tii Deuxule rare. <sup>3</sup>Tii ibutuhukỹlemy riwinyre. Tiiõhyykeki tahe, aõ releõtyhy.

<sup>4</sup> Umytuedeõna wahidỹỹdu tii ihỹre kia-di iny mahãdu rayky ritoosõnomyhỹre ritỹnynomyhỹre wahe. Kia loosõna heka bedede luru ludu loosõna rare. <sup>5</sup> Bedede luru tỹnyna loosõna rare. Loosõna ròtamyhỹre, bedede luru tahe ròanodỹỹmyhỹre.

<sup>6</sup> Deuxu teòduõ diteõnyde, Joaõ inire. <sup>7</sup> Tii loosõnamy rarybekremy nade. Kia rybe-di roholamyhỹreki, ibutumy iny rityhynyrenyremy. <sup>8</sup> Joaõ loosõna aõkõ rare. Urile tuu rarybekemy nade.

<sup>9</sup> Jesuisile loosõnatyhy rare. Tii bedede-ò nadeu, ibutumy iny rayky ritoosõnyre. <sup>10</sup> Tii bedede-ki raremyhỹ, bedede widỹỹdu rare, ihãre tahe iny rieryõhyyre mobo tii ihỹre. <sup>11</sup> Tasỹ mahãdu-ò dehemynde, judeu mahãdu-ò wahe. Ihãre tahe ridyõhyyre, rityhynyõhyyre urile teramy reare. <sup>12</sup> Iu inyõ Jesuisi rityhynomy ridyreu. Deuxu riõreõlemy risỹdỹỹnyre inimy rityhynyreki. Kia-ò tahe ruru tamy riwahinyre. <sup>13</sup> Kia ityhydỹỹdu tahe Deuxudeewilemy tule iriõreõmy roirekemy. Hãlubu-ribi aõkõ ratybienyre, urariribike

aõkõ, hãbudeewike aõkõ. Deuxudeewilemy iny ihỹmyhỹrenyre.

<sup>14</sup> Rybe tahe umyõ rimyre, demy rexiijenyre, inyyreny-ki rasỹnomyhỹre. Tii tỹxihikỹlemy Deuxu loosõna-di ratximyhỹre, ruxetõena-di inatyhyna-di nade. Inyboho tuu robirenyre. Deuxu Riõre delamy ratximyhỹre, sohojihyyre.

<sup>15</sup> Joaõ Jesuisimy rarybere kia wese: —Kiamy heka adeereny rarybere. Tii wahewomy kanakre heka waratyre awityhyre. Tii dori wako-ki rarehyymyhỹ waribi juhuutyhy wahe.

<sup>16</sup> Inyboho dori sõwemy ruxetõena iribi ritarenyre. Luuna sõwetyhymy tawo-ribi Jesuisi inyydeereny diwahinyde. <sup>17</sup> Deuxu bede ywina tahe Moisesi òraru-ki nade inyydeereny. Ruxetõenamy tahe inatyhyna Jesuisi Kristu òraru-ki nade. <sup>18</sup> Inyõ heka tiu Deuxumy robiõtyhy. Deuxuriõre delale heka itỹnydyỹdu rare. Tuunatyhy-di taãxiõti-ki rimyre. Tiile iny-ò Deuxu ditỹnynyde.

<sup>19</sup> Judeu mahãdu Jerusalẽ-ribi xiwena wahidyỹdu mahãduõ diteõnyde Joaõ dỹraxidyỹmy. Levita mahãduõ tule diteõnyde. Tahe roirenyre ritỹraxynekemy mobo tii raremy. <sup>20</sup> Tahe Joaõ-ò rỹraxyrenyre aõhereriwe mobo atxiteri. Joaõ dirawyõnyde inatyhymy rexitxiõnyreri: —Jiarỹ Kristu Deuxu deòdỹna aõkõ jiarỹ rare. <sup>21</sup> Tai tahe ixityre tamy rarybere: —Mobo tahe atxiteri, Elia aõbo. Aõkõre, Joaõ rarybere. Tahe Deuxu dee rybedu atxiteri inyboho riraõrenyleriõ wahe? Joaõ rarybere aõkõremy. <sup>22</sup> Tamy tahe ixityre raryberenyre: —Wakoreny bedelyyke mobo atxiterimy. Tai iny deòdỹdu mahãdu-ò

arelyyrenykre. Aõmybo iximy manarybeke?  
<sup>23</sup> Tahe Joaõ rarybere: —Jiarỹ Isايا Deuxumy rybedu wesele adeereny ararybekre. Jiarỹ rybeterenaduõ jiarỹ rare. Jiarỹ bederahy-ki iny-ò rarywãhã.

Inynyrỹ-ò ryõ biòbitinyke.

<sup>24</sup> Fariseu mahãdu-ribi kia mahãdu roirenyre.

<sup>25</sup> Tai tamy rarybere: —Kai Kristu aõbo tate? —Aõkõre. Elia aõbo? —Aõkõre. Deuxu dee rybedu aõbo? —Aõkõre. —Aõhereki tahaka iny teratysebenyteri? <sup>26</sup> Joaõ dirawyõnyde: —Jiarỹ bedi iny reratysebenyteri. Inyõ tahe ayreny-ile ratxireri. Tii tahe teeryõmahãtenyete. <sup>27</sup> Tii wahewo-ribi kanakre. Jiarỹ raixỹrumy watxireri iwataana ese-ki, tii waratyrereki. <sup>28</sup> Kia ibutumy aõhebo rotỹnyre Betỹnia hãwã bedeki. Jordaõ bero kowa weribi ijã-ki ihỹre. Tai iule Joaõ iny riratysybenymyhỹre.

<sup>29</sup> Txubiõwau tahe Jesuisi Joaõ-ò kedehe-mynykemy nade. Tahe rarybere: —Beteheke, kowa Deuxu budoeni naderi. Tii òraru-ribi iny ritakremynade. <sup>30</sup> Tuu jiarỹ rarybereu, inyõ wahewomy kanakre. Tii waratyre awityhy rare. Tii dori wako-ki rarehyymyhỹ waribi juhuure. Kia rarybereu tule jiarỹ tuurarybemaã.

<sup>31</sup> Reeryõre heka tii, ihãre tahe anade tii aritỹnykemy judeu mahãdu-ò. Tai tahe anade iny bedi reratysebenymahãremy.

<sup>32</sup> Tahe Joaõ tamyreny relyyre: —Jiarỹ Deuxu Tyytybytyhymy rabire tamy dobehede-ò. Bõtòe wesemy ityre-ò desede. <sup>33</sup> Deuxu riwateõnyre bedi iny ariratysebenykemy. Tahe riwateõnyreu tahe wadee rarybere: —Aõmy kai bobikre?

Deuxu Tyytybytyhy rononymy resekele inyõtyre-ò. Tii sohojile tahe Deuxu Tyytybytyhy-dí iny riratysebenykre. <sup>34</sup> Jiarỹ tuu rabire, tai tahe reeryre, tule taheka relyywãhãre, tii inatyhymy Deuxu Riõre raremy.

<sup>35</sup> Itxubiòwau tahe Joaõ taerydỹna inatxiõ-wana raremyhỹ. <sup>36</sup> Tahe Jesuisi nadeò tuu robire. Tahe tamahãdu-ò rarybere: —Kowa tahe Deuxu Budoeni naderi. <sup>37</sup> Kia rybe-ò tiiboho roholareu, tahe ròirenyre Jesuisi riheludunyrenykremy. <sup>38</sup> Jesuisi tahe tuu robire ihemy roirerimy. Tahe tamyreny rarybere: —Aõbo teijetenyteri. Tahe dirawyõnyde: —Rabi (kia rybe tahe irybereny-ki, erydỹdu rare), titxibo kai tasỹnymahãte. <sup>39</sup> Jesuisi rirawyõnyre: —Bòdòibedenyke betehebenykemy. Tahe tii-wana roirenyre, tamy reteherenyre. Tahe txioromy tii-wana ihỹmyhỹ. <sup>40</sup> Joaõ rybe-ò ijohonaduõ, Jesuisi helududỹduõ, Andre rare. Tii Simaõ Pedro seriõre rare. <sup>41</sup> Andre tahe taseriõre Simaõ aõwesele rioryre. Tahe tamy rarybere: —Mesia-ki inyboho rahamy ratximyhỹrenyre. (Ka rybe, Mesia, heka. Kristumy rare, Deuxu deòdỹna rare.) <sup>42</sup> Tahe Andre Jesuisi-ò Simaõ didyde. Jesuisi Simaõ-ò retehere urihimyò idi tamy rarybere: —Kai Simaõ tate, Joaõ riõrere. Iribi tahe ani Sefamy rarekre (Kani heka Pedro rare.)

<sup>43</sup> Itxubiòwau Jesuisi Kalileia-ò rakremy ixi-di rõhõtinyre. Tahe Filipi riijere. Tamy rarybere: —Wahemy manakekõ aõbo. <sup>44</sup> (Filipi tahe Besaida hãwã luduõ rare Pedro, Andre-wana ihãwãluduõle rare.) <sup>45</sup> Filipi tahe Natanaeli witxi

reare. Tamy rarybere: —Moisesi bede ywina tyyriti-ki inyõmy rarybere: —Tule Deuxu dee rybedu tyyriti-ki rarybere. Taile rahare. Jesu-isi ihÿre. Nazare hãwã luduõ rare. Jyje riõre rare. <sup>46</sup> Tahe Natanaeli ritÿÿraxinyre: —Aõwihikÿ aõkàbo Nazare hãwã-ribi kadòhònykre. Filipi rirawyònyre: —Manake betehékemy. <sup>47</sup> Jesuisi Natanaelimy robire naderimy tahe tuu rarybere: —Kowa judeu mahãduõ inatyhy rare. Tii hãbu òbiti rare. <sup>48</sup> Tahe Natanaeli rarybere: —Timykibo tiwaeryteri. Jesuisi rirawyònyre: —Figueira òra-ki tanyteò, umy rabire. Filipi aòrysomy raõreule, umy rabire. <sup>49</sup> Natanaeli rimasajuamy rirawyònyre: —Kai Deuxu Riõre tate Inyerydÿÿdu tate. Kai judeu mahãdu Iòlò tate. <sup>50</sup> Jiarÿ adee rarybera: —Figueiraòra-ki umy rabireki. Kiakile aõbo, ti-watyhynyteri. Iratyre aõna aõna wiwihikÿ adee ariteòsinykre. <sup>51</sup> Inatyhytyhymy adee araybekre: —Biuwetyy riranykre. Jiarÿ biuloosòna hãbu jiarÿ rare. Ýjuboho Deuxu-ribi wadee doideò kai bobikre. Idi waribi roireò bobikre.

## 2

<sup>1</sup> Inataõ txu-di tÿmyra herina txumy reare. Kana hãwã-ki Kalileia bede-ki. Jesuisise tai ratx-imyhÿre. <sup>2</sup> Jesuisi tule ritobinyre tamy rakremy taerydÿÿna mahãdu-wana. <sup>3</sup> Lisinaube tya-ki vÿi mona ituere. Tai Jesuisise Jesuisi-ò rarybere: —Vÿi mona ituere, imona kõre. <sup>4</sup> Jesuisi rarybere: —Nadi, aõhebo arotÿÿnykre. Aõka waw-idÿÿkõna wabededÿÿnanamy aõkõka bede rÿireri. <sup>5</sup> Tahe Jesuisise deòdu mahãdu-ò rarybere: —Anowidÿÿkÿmy adekereny tiki rarybekeki, ibu-

tumy biwinybenyke. <sup>6</sup> Debòsohoji reurò mana butxi nihikỹ tai rỹimyhỹ judeu mahãdu ibe-di brebu òraru-ki aõna aõna risuhòmehỹre worana bedehesinau. Mana butxi sohoji sohoji 80 urihixina ratyre rimyre. <sup>7</sup> Jesuisi tamyreny rarybere: —Ibutumy bedi bitỹxinybenyke. Tahe ibutumy ijà ratyre ritỹxinyrenyre. <sup>8</sup> Katahe iribi bitake. Worana bedehesi wedu-ò biwybenyke imona. Tahe riwyrenyre. <sup>9</sup> Kia bee heka Jesuisi riwitxiranyre vỹ monamy. Tahe iwedu riurihire, rieryõre tiribibo nade. Deòdu tahe rieryre juhoo bee rare. Tahe iwedu rarybere weryrybò heridu-ò: <sup>10</sup> —Katahe awityhyre. Kai ijõ-ribi iwitxiratyhymy tewinyteri. Ijõ iny heka awityhy iko-ò ritxiwimyhỹ. Ihewomy tahe awiriõre ritxiwimyhỹre. Kai tahe awityhy ikonana-ò teyrubunyta. <sup>11</sup> Katahe aõna aõna wiwihikỹ iny itxerenamy juhu ludu rare. Kana hãwã-ki Kalileia bedeki ihỹre. Tii tarurutere riteòsinymyhỹre taerydỹỹna mahãdu-ò. Tai ierydỹỹna mahãdu rityhynyre.

<sup>12</sup> Iribi tahe Kafanaõ hãwã-ò Jesuisi dobehede tadi, taseriõre, taerydỹỹna mahãdu tii-wana roirenyre. Ijõtxumy tahe tai bedi tỹnyna rỹira.

<sup>13</sup> Pascoa worana bedehesi iòhòmỹ rỹireu, Jerusalẽ rotuore kia tahe judeu mahãdu worana bedehesina rare. <sup>14</sup> Tai Jesuisi Deuxu dohodỹỹna hetowo-ò ralore. Tahe iwo-ki itxi reare sõwemy aõna aõna-di rohonyreriò, broreni-di ijohodu-txi, budoeni-di ijohodu-txi, bõtõe-di ijohodu-txi, tule nieru witxira witxira wibydyỹdu mahãdu-txi reare tai ronymyhỹki. <sup>15</sup> Jesuisi reroti awaru hãtena wesemy riwinyre. Idi tahe dohodỹỹna

hetowo-ribi ibutumy riòlòdỹre, budoeni, broreni-wana, tahe nieru wibydyỹdu mahãdu oworubesedyỹ-di Jesuisi rehure, tai nieru rejuxunyre. <sup>16</sup> Tahe rare bòtòe-di ijohodu-ò. Tamy rarybere: —Biòlòdỹnyke wa. Waha heto dori aõ-di ijohona aõkõ rare. <sup>17</sup> Tahe Jesuisi erydyỹna mahãdu tõihti-txi reare aõbo Deuxu Tyyriti-ki roiretxi:

—Waha heto yrubudyỹna-ki dori riwasamyhỹre. Ariyrubunyky dori watrixeri, tai riwasareri.

<sup>18</sup> Judeu mahãdu Jesuisi-ò rỹraxire: —Aõherekibo kai teòlòdỹnyteri. Mobo he arateranyreri tuu biwinykemy. <sup>19</sup> Tahe Jesuisi rirawyõnyre: —Deususỹ-di behuke tahe inatã txu-di aditamadyỹnykre. <sup>20</sup> Tahe judeu mahãdu rarybere: —Ka heto 46 beòra-di relere, timykibo kai inatã txu-di biwinykemy. <sup>21</sup> Jesuisi tahe Deuxusỹmy taumylemy rarybere. <sup>22</sup> Iribi tahe iu rubu-ribi iixixana-txi tõihtireny reare, kia tuu rarybere-txi. Tai heka iritina rityhynyre, tule Jesuisi rybe rityhynyre.

<sup>23</sup> Jerusalẽ-ki Jesuisi Pascoa worana bedehesidyỹna riwyre. Aõna aõna wiwihiky inyy-ki ritxiennyre riwinyre. Tai sõwemy iny inityhy rityhynyre. <sup>24</sup> Jesuisi tahe urihimyõle iny rityhynyre. <sup>25</sup> Tii dori ibutumy iny rayky rierymyhyre. Inyõ timy iny raremy tiu tamy aõna relyyõtyhy tii ibutumy aõerydu rareki.

### 3

<sup>1</sup> Nikodema fariseu mahãduõ rare. Tii judeu mahãdu weduõ rare. <sup>2</sup> Tii rudimy Jesuisi ro-

ramy rara. Tahe tamy rarybere: —Wanyrỹ, reeryrenyre kai Deuxu-ribi erydỹỹdu tate. Inyõ Deuxu-diõkeki tii aõ wiwihikỹ riwinyõtyhy. Iwese aõ wiwihikỹ kai tewinyte wese. <sup>3</sup> Tahe Jesuisi rirawyõnyre: —Inatyhytyhymy adee ararybekre: —Inyõ ixityre reakõkeki, tiu Deuxu Òlõnasỹmy ro-biõtyhy.

<sup>4</sup> Nikodema rỹỹraxire: —Timykibo matuari ixityre reakemy. Timyrabo, ixyby tadiwo-ò iny ralòkeki aõbo ixyby iny raumynyke. <sup>5</sup> Tahe Jesuisi rirawyõnyre. Inatyhytyhymy rarybere. Inyõ bera-ribi ratybienyõkeki Deuxu Tyytybytyhy-ribi ratybienyõkeki, tiu ralòõtyhy Deuxu Òlõna-ò. <sup>6</sup> Deribi tybie heka dee rare. Deuxu Tyytybytyhy-ribi tybie tasỹ tyytyby rare. <sup>7</sup> Idi wanaõtaõmy aõmybo rarybereridi ixityre ijiranamy. <sup>8</sup> Tiò tiò yhy ribonymyhỹre: —Iwodỹỹ taholate, tahe tiribibo namyhỹde teeryõmahãte tiõhe ramyhỹre teeryõte, kia wesele iny Deuxu Tyytybytyhy-ribi tybie iny rỹire. <sup>9</sup> Tahe Nikodema rỹỹraxire: —Timyrebohe kia ratxike. <sup>10</sup> Jesuisi dirawyõnyde: —Kai judeu bede erysydỹỹdu tate ihãrele teeryõte aõbo. <sup>11</sup> Inatyhytyhymy adee rarybere aõmybo reeryre, aõmybo rabire. Ihãrele tahe kia tetyhynyõte. <sup>12</sup> Bede aõmydỹỹnanamy rarybere tahe tetyhynyõte. Timybo bityhynyke biu aõmydỹỹnanamy ararybekeki. <sup>13</sup> Iny sohojile biu-ò raõwõnyre, Deuxu Riõre Hãbutyhyhykỹ rare. Tiile iribi juhu dobehede. (Tiile isỹre. Taile isỹ roire.) <sup>14</sup> Iwese Moisesi bederahy-ki womati hemylala ritamadỹỹnyre wese, Kiawesele jiarỹ, Deuxu Riõre



Hãbutyhyhykỹ, wadi kidiwatamadỹnykre. <sup>15</sup> Tahe inyõ wadi rityhynykeki, umytuedeõna tuu ritamy rỹihyy rakre.

<sup>16</sup> Deuxu Riõre sohojihyyle rare. Deuxu bedede ludu mahãdu ibutumy iluutyhyre. Tai tahe tariõre diteõnyde iny rityhynykre. Inyõ tii rityhynyre-wana, umytueõnahakỹ ritakre. Tii ruruõtyhy rubu bina bede-ò. <sup>17</sup> Deuxu taRiõre bede-ò diteõnyde bedede iny mahãdu tarasadumy rarekemy. Aõ iny ywisidỹna-ò rirutykemy aõkõ. <sup>18</sup> Inyõ rityhynymyhỹreki, tii ywisidỹdu idi rehuõtyhy. Iny rityhynyõmyhỹreki tiihe aõhõkỹmy dỹnana-txi riteõnykre. Deuxu idi ratximyhỹre, tii dori Jesuisi rityhynyõhyymyhỹre, Deuxu Riõre dela wahe. <sup>19</sup> Ibinatyhymy iny aõmydỹnana bedede bedemy rỹira, tai bedede luru-ki rira tamy awira. Tuu loosõna nadeu, tamy ibinare. Tai tahe Deuxu riteõnykemy idi ratximyhỹre. <sup>20</sup> Inyõ aõbinahakỹ rotỹnymyhỹre, loosõna dera heka tuu rỹira; loosõna-ò rehemynyõtyhy, rehemynyre-wana, iny taaõbina bina rierymyhỹre. <sup>21</sup> Iny tahe awiwihikỹle rotỹnymyhỹre-wana tii tahe loosõna-ò rehemynykre rỹira, taaõmydỹnana dori Deuxudeewimy ririmyhỹre, ibutu iny rierykre ririre.

<sup>22</sup> Iribi tahe Jesuisi taerydỹna mahãdu-wana Judeia bedede-ò ròirenyre. Tai heka bededỹnanaõ riwre. Tiiboho iny ityhydỹdu mahãduõ tai riratysebenyrenyrene. <sup>23</sup> Joaõ iribi iõhõmy ratxireri. Iny riratysebenymyhỹre. Tii Eno hãwã-ki Salĩ hãwã-ribi iõhõmy roire. Tai riratysebenyrene sõwemy bee tai roimyhỹreki. Sõwemy iny tamy

ratysebenymy rare. <sup>24</sup> (Joaõ iu rotenamy ralòõlemy ratximyhỹ.) <sup>25</sup> Judeu mahãduõ, Joaõ erydỹỹna mahãdu-wana rybetere txiõdỹỹna ròhònryra, bede ywina òbiti aõmydỹỹnanamy wahe. <sup>26</sup> Tahe Joaõ erydỹỹna Joaõ-ò doidenyde rarybekremy: —Waerydỹỹdurenny. Kai hãbumy telyymy tatemahã, kia Jordaõ kanawe-ribi ijà-ki umy-wana raremyhỹ, tii ròratysebenyneri. Sõwemy iny tamy wirotyre. <sup>27</sup> Tahe Joaõ tamy rarybere: —Kia wadee awire aõ aõkõ iny ritamyhỹre, biu-ribi kanakekile tahe iny aõ ritake. <sup>28</sup> Jiarỹ heka Jesuisi nonanamy ijyymy diwateònyde wahewo-ribi kanakremy. Jiarỹ tii aõkõ rare. Tii tahe Kristu tyhy rare. Jiarỹ kiamy juhUU rarybewãhãre: —Kia tahe teerytenyde. <sup>29</sup> Inatyhymy tahe hãbumy heridu wesemy Jesuisi rare. Ibutumy iny tuu robikemy tamy wirotyre. Ibiòwa weselemy jiarỹ rare. Tahe irybe-ò raholareu, reysamy rarewãhã. <sup>30</sup> Tai wadee awire iny tii rieryreki, waribi tahe nohõti rosakemy idi watxiwãhãre.

<sup>31</sup> Tii biujuxahakỹ-ribi nadeki ibutu ratyremy ratximyhỹre. Bede-ribi jiarỹ anadeki, tahe bede ludu jiarỹ rare, bede aõmydỹỹnanamy rarybewãhãre. <sup>32</sup> Tii rarybere aõmybo roholare, robire, tahe ijõ iny rityhynyõhyyre irybe. <sup>33</sup> Inyõ tahe rityhynykeki, tii tule ijõ-ò rarybere, Deuxu inatyhy rare wahe. <sup>34</sup> Deuxu deòdỹỹna heka irybelemy rarybere Deuxu dori Tatytybytyhy ibutumy tamy diwahinyde. <sup>35</sup> Tyby taRiõre luure, tai tahe ibutu aõmydỹỹnana ywisidỹỹmy tamy diwahinymy diteònyde. <sup>36</sup> Iny Jesuisi rityhynymyhỹreki, umytuedeònahakỹ-di iny rỹira.

Inyõ tamy ratxiõkeki, tiu umytuedeõna robiõtyhy, Deuxu ykarana dori tii-wana ratximyhÿre.

## 4

<sup>1-4</sup> Inyõ fariseu mahãdu-ò rarybere: —Jesuisi Joaõ-ribi iny sõwemy diratysebenymyhÿde. Sõwemy iny ritamyhÿre ierydÿÿmy. Tahe Jesuisi aõkõ ròratysebedÿÿmyhÿre, ierydÿÿnale tahe riratysebenymyhÿre. Iu Jesuisi kiamy rieryreu tahe, Judeia-ribi rexitare. Roirenyre Kalileia bede-ò ritehemynkemy. Roirenyreu tahe Samaria bededihyyle riòhòrenyre. <sup>5</sup> Samaria bede hãwãõ-ò tahe ritehemynyre. Sika inire. Ijaò riòresu-ribi iòhòmy ròira, tariòre Jyje-ò riwahinyre wahe. Ijaò behãloo tai rÿimyhÿ. <sup>6</sup> Txutyeyu tahe Jesuisi elerihynymy rononymhÿ tatilemy nadeki berysyna werora-ki. <sup>7</sup> Tahe Samaria mahãdu hãwyyõ dobehede beixemy. Jesuisi tamy rarybere: —Beõ inihe wadee bidiõke. <sup>8</sup> Jesuisi erydÿÿna mahãdu tahe juhuu roirenyre hãwã-ò rÿsÿna itxemy. Tai Jesuisi riraòmy rononymhÿ. <sup>9</sup> Tahe hãwyy rarybere: —Kai judeu mahãdu tate, jikarÿ samaria mahãdu rare. Anoherekibo wadeke textitòenyteri bemomomy. (Judeu mahãdu Samaria mahãdu-wana wiymy reaõhyymyhÿre. Widi òludu wesemy rare.) <sup>10</sup> Tahe Jesuisi rirawyònyre: —Kai heka teeryõhytyteri mobo jiarÿ rare wahe. Tule, Deuxu wahisidÿÿna teeryòte. Tiwaeryteriwana kai bedexitòenyke, tahe bee irumy ihÿre adee ariwahinyke. <sup>11</sup> Hãwyy rarybere: —Wahĩ, timybo bee irumy ihÿre wadeke kanakre. Kai ahynakõre, hãloko heka behekyre bee irehere. Timybo bee iru kumy-wana ratxireri.

<sup>12</sup> Kai anobohe inytyby Ijaò ratyrere. Tiki heka behâloko wedu juhuku rare; idi riwahinyre inydekereny. Iribile iritxiòre riõmyhỹre tiki-wana, ibroneni riõmyhỹre. <sup>13</sup> Jesuisi tahe tarybetyhy-di rarybere: —Inyõ kahâloobemy riõkeki, ixityre bemomomy ruruke. <sup>14</sup> Jiarỹ bee ariwahinyke. Inyõ tahe kiabemy riõke-wana, tiu bemy tamy umytuedeõnahakỹ riwahinyhyymyhỹre. <sup>15</sup> Tahe hâwyy rarybere: —Wahĩ bee tuedekõdu ikuny tuu kariõke. Tai kakò kanakõtyhy berysomy. <sup>16</sup> Tahe Jesuisi rarybere: —Maa hỹny, ahâbu biòryke, tahe manake. <sup>17</sup> Hâwyy dirawyònyde: —Anokõre, wahâbukõre. Jesuisi rarybere: —Inatyhymy tarybeteri ahâbuõremy. <sup>18</sup> Kai heka iruyre ahâbu tate. Wijina tahe ahâbu aõkõ rare atỹhibiòwale wahe. Kia tahe inatyhymy tarybeteri. <sup>19</sup> Wahĩ, wiji tahe arakeryra, kai Deuxu rybeduõ tate. <sup>20</sup> Wahareny Deuxumy reâlâmyhỹre kahâwâlò-ki. Amahâdu anokõ, tamy tahe Jerusalê Deuxu deâlâna rare. <sup>21</sup> Tahe Jesuisi rarybere: —Lerỹ, warybe bityhynyke. Kanakre itxu kahâwâlò-ki aõkõ, Jerusalê-ki aõkõ Waha Deuxu deâlâna rarekre. <sup>22</sup> Kaiboho aõmybo teâlâte teeryõtenyde. Jiarỹboho tahe aõmybo reâlâre, reeryrenyde, tarasana dori judeu mahâdu-ribi nade. <sup>23</sup> Kia bededỹnanamy reara. Inyõ Waha Deuxu àlânamy ratximyhỹreki Deuxu Tyytybytyhy-di, inatyhyna-di reâlâmyhỹke. Tuu deâlâna mahâdu Deuxu riijemyhỹre. <sup>24</sup> Deuxu Tyytyby rare: —Tai tahe tudeâlânadu tatytyby-ki inatyhyna-ki tuu reâlâmyhỹre. <sup>25</sup> Kia tahe jikarỹ rekeryre, Mesia kanakre, Deuxu dekodỹkỹnamy wahe, Kristu inire.

Tiki kanakreku wahe, ibutumy inydekereny anona anonamy relykykre. <sup>26</sup> Jesuisi rarybere: — Jiarỹ tahe tiire, umy-wana wiji rarybereri wahe.

<sup>27</sup> Tahe Jesuisi erydỹỹna mahãdu rehemynyre. Hãwyy-wana rarybereriki tahe ribedeòtiidỹỹnyrenyre. Tahe inyõ tamy rỹĩraxiõhyyre. Aõmybo tamy rỹĩraxire, ada aõherekibo tamy rarybereriki. <sup>28</sup> Iu tahe hãwyy tabutxi ririre, hãwã-ò rara. Tahe tahãwã mahãdu-ò rarybere: <sup>29</sup> —Bodoibedenyke wahemy. Betehebenykemy hãbu-kò. Tiki wakoku relykyre ibutumy anohebo ratỹkỹnymahãremy. Tiki kòsana Kristu ratxireri. Deuxu dekòdỹkỹna rare. <sup>30</sup> Hãwã-ribi roirenyre Jesuisi-ò. <sup>31</sup> Iu hãwyy hãwã-ki rareamyhỹreu, tahe ierydỹỹna Jesuisi-ò rarybere: —Iny erydỹỹdureny rỹsỹnaõ birỹsỹke. <sup>32</sup> Tahe Jesuisi rarybere: —Warỹsỹnadire wahe. Kaiboho heka kia rỹsỹna teeryõtenyte. <sup>33</sup> Tahe widee raryberenyre: —Inyõ kãaõboka tamy rỹsỹnaõ riwyreri. <sup>34</sup> Jesuisi rarybere: —Wadeòdỹỹdu deewimy ariwinykemy idi watzireri. Kia tahe warỹsỹnare, iaõmysỹdỹỹna arihukemy wahe. <sup>35</sup> Maixõmo butuna inaubiòwa ahãdu-di bidiòrarunybenykemy kaiboho tahõtinytenyteri. Tahe aõkõre adeereny ararybekre. Betehebenyke bedero-ò. Maixõmo redenamy rỹire. <sup>36</sup> Kia maixõmo butudỹỹdu iòwy ritake, tahe umytuedeõnahakỹ-ò iny ributunyre. Tahe wiwanale riwodeysanymyhỹre ibròdỹỹdu ibutudỹỹdu-wana. <sup>37</sup> Iwese inyõ rarybere wese, inatyhy rare. Ijõ tahe ibòròdỹỹdu rare. Iwitxira tahe ibutudỹỹna rare. <sup>38</sup> Jiarỹ kaiboho

arateònymahãre. Aõbo tebòrònyõtenyte tahe bibutunye. Juhuu inyõ raaõmysÿdÿÿre: — Kaiboho tahe iraty temytenyte.

<sup>39</sup> Tahe hãwyy òraru-ki sówemy Samaria hãwã mahãdu rityhynyre. Hãwyy rarybere juhUU: —Tiki wakoku relykyre ibutumy anohebo ratÿkÿnymahãre walananonanamy relykyre. Kia rybe òraru-ki tahe rityhynyrenyre. <sup>40</sup> Samaria hãwã mahãdu tahe Jesuisi-ò rexitòenyre tii-wana roirekemy. Tahe Jesuisi tii-wana inatxi txumy riwyyre. <sup>41</sup> Sówemy tahe rityhynyre Jesuisi Rybe òraru-ki. <sup>42</sup> Tahe hãwyy-ò rarybere. Wiji tahe arybe òraru-ki aõkõ retyhynyneri. Tamy tyhy-ò jiarÿle raholare, tahe reeryre tii bede iny tarasadu tyhymy raremy.

<sup>43</sup> Inatxitxu-di tahe Samaria-ribi rare Kalileia bede-ò. <sup>44</sup> Jesuisile dori rarybere: — Deuxu rybeduõ uladumy ijirana bede-ki iny rityhynyõhyymyÿ. Tiu tamy wowydynaõ riwahinyõtyhy. <sup>45</sup> Kalileia mahãdu juhUU Jerusalẽ-ò tule roirenyre, worana bedehesi rÿimyhÿraò. Ibutumy aõbo Jesuisi riwinyra heka tiiboho reteherenyre. Tai Jesuisi tasubede-ò rehemynyre tiiboho awimy ridyrenyre.

<sup>46</sup> Tahe ixityre Jesuisi rehemynyre Kana hãwã-ò. Juhuu tai bee riwitxiranyre vÿi monamy wahe. Bede dinodu aõmysÿdÿÿdu Kafanaõ-ki rasÿnyre. <sup>47</sup> Jesuisi Kana hãwã-ki ratxirerimy hãbu roholareu, tamy rara. Tariòre dori ibinamy roire taheto-ki. Jesuisi-ò hãbu rarybere: —Manakekõ aõbo waheto-ò wariòre biteytekemy. <sup>48</sup> Jesuisi rirawyònyre: —Kaiboho bede aõmydÿÿnana wiwihikÿ tetehetenyteule tetyhynytenyte. <sup>49</sup> Hãbu

heka Jesuisi-ò rarybere: —Wanyrỹ, wylemy manake wariòre rurukreko-txi. <sup>50</sup> Jesuisi rarybere: — Bòòseke, ariòre dori awimy relera. <sup>51</sup> Tahe tii Jesuisi rybe rityhynyra tai ròòsere taheto-ò rakemy. Ijõ txu tahe ryro-ki teòdu-wana witxi reare. Tii rarybere: —Ariòre reytera ahatokile. <sup>52</sup> Hãbu ritỹỹraxinyre tiubo reytera. Tahe relyyre. Kaule, txutyeyu reytera. <sup>53</sup> Jesuisi rarybereu, kiaule iriòre reytera. Hãbu rieryre. Tai tahe idi ibutumy hãbu sỹmahãdu Jesuisi rityhynyre. <sup>54</sup> Kia tahe Jesuisi inatxina aõna aõna wiwihikỹ iny itxeranamy riwinyre Kalileia bedeki.

## 5

<sup>1</sup> Iribi tahe judeu mahãdu worana bedehesimy rỹimyhỹ. Tai tahe Jesuisi rare Jerusalẽ-ò. <sup>2</sup> Hãwãy-ki tahe hãloo ibedỹỹ roimyhỹ budoeni ryijò iòhò-ki rỹimyhỹ. Beteta inire, hebraika rybe ini rare, judeu rybe wahe. Iruyre iwòtena ube iwerora-ki rỹire. <sup>3</sup> Sõwemy webinadu ube-ò wii rotyre, iny ruetà ijõre, iny tiere ijõre, inytibina ijõre. <sup>4</sup> Tiiboho ýjuõ riraòmyhỹre. Ýju beò rerireu tahe raukỹre. Mobo juhu itxi resekeki tahe, tii reytemyhỹre. <sup>5</sup> Hãbuõ 38 beòramy ibinamy roimy raremyhỹ. <sup>6</sup> Jesuisi tamy retehereu, rieryre tiwesebeòrabo ibinamy roimy rare myhỹ. Tahe tamy rarybere: —Kai aõbohe beytekekõ. <sup>7</sup> Hãbu dirawyònyde: —Aõkõre Wanyrỹ, wawiòhedỹỹduõre. Bee rexiukỹnyrau, ijõ wako-ò ralòmyhỹre. <sup>8</sup> Jesuisi tamy rarybere: —Myikewa, abyre bimykke, mariake. <sup>9</sup> Aõwesele hãbu rỹimy reare, awimy. Tabyre rimyre tahe rariare. Kia txu tahe sabado txu

rare. Kia txu tahe judeu aõmysỹdỹna txu aõkõ rare. <sup>10</sup> Tai tahe judeu mahãduõ tamy rarybere: —Abyre-di riraõmy, sabado txu dori òbiti aõkõ rareki. <sup>11</sup> Tahe dirawyònyde: —Wadeytedỹdu wadee rarybere wabyre arimykeny. <sup>12</sup> Tahe tamy rỹraxyre: —Mobo adee rarybere abyre bimykeny idi mariakemy. <sup>13</sup> Tahe hãbu deytedu rieryõre mobo rare. Jesuisi dori dexitade iribi. Sõwemy iny tai rỹimyhỹ. <sup>14</sup> Deuxu dohodỹna heto-ki Jesuisi idi hãbu-ki rahara. Tamy rarybere: —Kai teyteta, inatyhy. Tai tahe aõraruna biixãwidinyke, aõbinatyhy aõhe adee rotỹnyheny. <sup>15</sup> Hãbu tahe rare. Judeu mahãdu-ò rarybere, mobo teytedỹdu raremy, Jesuisi wahe. <sup>16</sup> Tai tahe judeu mahãdu Jesuisi ibinamy rexideny rarybere, sabado txuu kia riwinyreki. <sup>17</sup> Jesuisi tahe rarybere tamyreny: —Waha, Deuxu aõu raaõmysỹdỹre, jiarỹ tulere. <sup>18</sup> Tai tahe sõwemy irubudỹmy ruryhyre. Sabado txu bede ywina-ribi tii riwinyõre. Tule Jesuisi Deuxu wesemy rexioire, Wahamy dori rarybemyhỹreki.

<sup>19</sup> Tai tahe Jesuisi tamyreny rarybere: —Jiarỹ ixi-di aõkõ aõmydỹnanamy ratỹnymahãre aõbo Waha riwinymyhỹre, jiarỹ tule rewinywãhãre iweselemy. <sup>20</sup> Waha Deuxu dori waluure. Aõbo riwinyre wadee riteòsinyre, tai tahe aõruxerahakỹtyhymybo bobibenykre, idi bede biòtiinybenykre. <sup>21</sup> Waha Deuxu dori rubu-ribi iny riixixanymyhỹre. Tai tule jiarỹ iny areixixanyke ixideewikeki. <sup>22-23</sup> Ibutumy iny hitxidỹna Waha wadee tuu rarybera, tii dori iny rihitxidỹnyõtyhy. Jiarỹle tahe iny ywisidỹdumy aròhònykre, tai



iwese Deuxu iny riwowydynymyhÿre wesele iny riwawowydynymyhÿkre. Adeereny Deuxu diwateònyde. Tai inyõ riwawowydynyõkeki, tii Deuxu riwowydynyõreri. <sup>24</sup> Inatyhytyhymy adeereny ararybekre. Inyõ warybe roholakeki, wateòdÿÿdu rityhynykeki, tii wijityhyle umytuedeõna ritake, ywisidÿÿduko-ò ròhònyõtyhy, rubu ryribi ròhònyre umy irumy ihÿre ryò iny ralòmyhÿre. <sup>25</sup> Inatyhytyhymy adee arelyykre: —Bedeÿÿnana-ki kòhòra, bede dÿÿnanamy reara. Tahe rubu mahãdu Deuxu Riòre rybe-ò roholakre. Roholamy rÿikeu tahe irumy rÿike. <sup>26</sup> Tyby dori iumyõnanaõhyre wese tule iRiòre rare. Umytuedeõna wedu rare. <sup>27</sup> IRiòre heka hitxidÿÿna wedumy relere. Tii dori Deuxu Riòre Hãbutyhyhykÿ tii rare, jiarÿ wahe. <sup>28</sup> Bedeòtiidÿÿõmy tahe bededÿÿnanamy he reare. Rubu mahãdu wabedey-ki warybe-ò roholakre, tai iribi ròhònykre. <sup>29</sup> Ibutumy aõwibo riwinyre mahãdu kedexixakre umytuedeõnahakÿ-di. Kia ibinamy riwinymyhÿre mahãdu ywisidÿÿdu-ò rexixakre.

<sup>30</sup> Jiarÿ ixi-di aõkõ aõmydÿÿnanamy ratÿÿnywãhãre. Iwese Waha-ò raholare wese iny ywisidÿÿmy aròhònykre. Waywisidÿÿna heka òbiti rare. Wadee wimy aõkõ dori tuu watxiwãhãre. Waha wadeòdudeewimy tuu watxiwãhãre. <sup>31</sup> Iximy ararybekeki, inyõ riwatyhynyõtyhy. <sup>32</sup> Iwitzira heka tuu rarybereri wamy wahe. Reeryre inatyhy raremy. <sup>33</sup> Kaiboho inywitzira teteònytenyte. Joaõ ratysebedÿÿdu-ò rÿÿraxikemy ibutumy kia wamy rarybere inatyhy rare jiarÿ inatyhy

rare. <sup>34</sup> Iny wamy rarybemyhỹre, tahe jiarỹle kia reijeõhymahãre inyle rieryõre wamy rybe, wahe. Tahe kiamy adee relyywãhãre kaiboho ritamy rỹikemy. <sup>35</sup> Joaõ tahe loosõna wesemy raremyhỹ. Tii urihimyò bededỹỹnana ritoosõnyny raremyhỹwesemy tahe kaiboho atximahãtenyte. Idi urihimy-ò teysatenyte iloosõna-di, idi iribi kaiboho terarenyre. <sup>36</sup> Jiarỹ Waha òraru-ki aõmydỹỹnana wiwihikỹ, rewinyamahãre. Kaheka inatyhymy urihixina rare. Joaõ wamy rarybere ratyre heka kaa roire, Deuxu Waha inatyhymy wadeòdu raremy riteòsinyre. <sup>37</sup> Waha wadeòdu wamy tule relyyre. Kaiboho irybe-ò taholaõtenyte tule tii tabiõtenyta. <sup>38</sup> Kaiboho tamy taholaõhymahãtenyte, tiwatyhynyõteki, jiarỹ dori iteòdỹỹna rare. <sup>39</sup> Tyyriti-ò tetehetenyte iwo-ki dori umytuedeõna-ki mahakemy tahõtinytenyte. Ritidỹỹnakile wamy relyymyhỹre. <sup>40</sup> Ihãrele tahe wadee taõmahãte adeeremy umytuedeõna ariwahinykemy. <sup>41-42</sup> Aõmybo wamy iny rarybemahãkeki, aõ aõkõ rare wadee, jiarỹ dori reeryre Deuxu luuna-di aõkõ atxitenyteri. <sup>43</sup> Jiarỹ Wahani-di anade, tahe kaiboho tiwatyhynyõmy wadi ahãte. Inyõ ixideewilemy kanakeki, kaiboho bityhynybenykre. <sup>44</sup> Tai heka tetyhynyõmahãtenyte. Widee dori kaiboho tewowydynymahãtenyte, tahe Deuxu-ribi wowydyna ritakemy terarenyre, sohojihyyre heka Deuxu. <sup>45</sup> Kiamy tahe Waha-ò arelyyõkre, Moisesi tahe relyykre. Moisesi bede ywina dori, araròsõnyreny rare. <sup>46</sup> Inatyhymy Moisesi tetyhynymahãte-wana tule jiarỹ

biwatyhynymahãke, wamy dori Moisesi ròratidỹyre. <sup>47</sup> Irybe bityhynyõkeki, timybo warybe bityhynyke.

## 6

<sup>1</sup> Iribi tahe Jesuisi Kalileia aho-ki ixyby reurore, Teberiaade ahoniõre. <sup>2</sup> Tahe sõwemy iny riheludunyre tuu robireki, aõna aõna wiwihikỹ, deyledỹỹna wiwihikỹ robireki. <sup>3</sup> Tahe hãwãlòratyy-ò Jesuisi raòwònyre taerydỹỹna mahãdu-wana —rorukurenyre tai. <sup>4</sup> Judeu mahãdu worana bedehesi rexidelenykemy iòhòre. <sup>5-6</sup> Tahe Jesuisi retehere inysõwehekỹ-ò, tamy rehemynyreriò. Tai Filipi-ò riurihimy rarybere: —Tikibo orotxu tamyreny rikiõbranyke riyrenykemy. Jesuisi rierymyhỹre aõbo riwinykremy ratxireri ihãrele tahe Filipi-ò kia rarybere. <sup>7</sup> Filipi tahe dirawyònyde: —Inyõ sohoji sohoji orotxu yre sohoji riykeki, 200 prata womati nieru rakahurenyke ihãre rimyõtyhy. <sup>8</sup> Andre Jesuisi erydỹỹna-ò rare, Simaõ Pedro seriòre rare. Tii tahe Jesuisi-ò rarybere: <sup>9</sup> — Weryryboõ kaki ihỹmyhỹ. Iruyre cevada orotxu idi ratximyhỹ, utura inatxi. Kia tahe aõ aõkõ rare inysõwe-ò. <sup>10</sup> Tahe Jesuisi taerydỹỹna-ò rarybere: —Tamy marybebentyke ranyrenykemy asityrekile. Tahe rorukurenyre ibutumy. Hãbu 5000 ronyre ijõ inyõ tahe sõwetyhymy rorukure. <sup>11</sup> Jesuisi orotxu rimyre. Deuxumy reàlare, idi tahe tamyreny riwahinyre. Tule utura-wana wiwesele risỹnymy. Tuu rotỹỹnyre. Ibutumy heka ixideewina rirỹsỹrenyre. <sup>12</sup> Rihydyrenyreu,

Jesuisi rarybere taerydỹna mahãdu-ò: — Bibutunybenyke rauhenyra uritere ixinamy itxiwixirenyõkemy idi watzireri. Uritere idi dehurenyõmy. <sup>13</sup> Tahe ributunyrenyre iuhe waòinatxi reuròmý weriri ritỹxinyre orotxu yrere-di. <sup>14</sup> Jesuisi aõwiwihikỹ widỹnyamy robirenyreu kiamy tahe raryberenyre. Tii inatyhymy Deuxu Rybedutyhy rare. Juhuu dori tuu rarybere kabede-ò kanakemy. Inyboho tii riraòmýhỹre.

<sup>15</sup> Rõhõtynyrenyre: —Jesuisi inyiòlòrenymy rikimyrenykre. Tamy ròkòirenykre. Iu Jesuisi kia rieryreu, ixisohojilemy rexitare ixiby, hãwãlò-ò.

<sup>16-17</sup> Ibedesou aho ijà-ò ierydỹna mahãdu riberenyre riraòkemy. Bede rurunyre tahe Jesuisi rehemynyõhyre. Tai hãwòõ rimyrenyre idi reuròkemy ijõwe-ribi ijà-ò, Kafanaõ hãwã-ò. <sup>18</sup> Tahe yhy deborehekỹ tiribi tiribi rebonymhỹ. Òbò tahe resemyhỹ. <sup>19</sup> Sohoji urihixina iòhòmý ròireny tahe Jesusimý robirenyre. Tii betyredile tamyreny nariamy nade. Tiiboho ruberunihikỹrenyre. <sup>20</sup> Jesuisi tamyreny rarybere: —Jiarỹle wa rare, breburenyõmyke. <sup>21</sup> Tai tahe hãworo-ò Jesuisi ronykemy tiiboho disỹnydenyde. Aõ wesele tahe rehemynyrenyre tiòbo ròirenyraò.

<sup>22</sup> Itxubiòwamy sõwemy iny wii ributunyre aho kanawe-ribi ijà-ki. Hãwò sohojile tahe tai roire aho-ki. Jesuisi erydỹna mahãdu roirenyremy rieryrenyre. Tahe Jesuisi aõkò idi rare. <sup>23</sup> Tahe hãwòõ dehemynydenyde. Teberiaade hãwã-ribi Jesuisi tai ratximyhỹ iòhò-ò. Tai juhu Jesuisi rexitòenymy rỹimyhỹ

tahe orotxu tamy riwahinyre. <sup>24</sup> Jesuisi iõre tai, ierydỹna mahãdu iõre. Kia tahe iny sõwemy robirau, hãwò-ò rimyrenyre. Iòrysomy roirenyre, Kafanaõ-ò. <sup>25</sup> Kanawe-ribi ijà-ò rehemynyreu, tii-wana witxi reare. Tahe tamy rỹraxire. Waerydỹdureny, tiubo kaò tadehemynyte. <sup>26</sup> Aõwihikỹ rewinyremy aõkõ tiwaijetyteri, rỹsỹna adeeremy rewahinyrakile, tehydmy terỹsỹtenytakile. <sup>27</sup> Rỹsỹna tyhy ituemyhỹre kiaòle aõkõ maaõmysỹdỹbenyke, tahe iwixira rỹsỹnaõ-ò maaõmysỹdỹbenyke, kia ituedeõna-di aõkõ rare. Deuxu Riòre Habutyhyhỹkỹ dori adee riwahinykre. Kia rỹsỹna umytuedeõnahakỹ wesemy rare. Taile tahe Deuxu Waha riwateònyteri. <sup>28</sup> Tahe Jesuisi-ò rỹraxire: —Timybo iny Deuxudeewimy arotỹnyrenykemy. <sup>29</sup> Jesuisi dirawyònyde: —Kialemy, biwatyhybenyke: —Deuxu dori wateòdỹdumy rare. <sup>30</sup> Tahe raryberenyre tamy: —Aõwihikỹbo inyko-ò biitxeredỹnyke. Aõhebo botỹnykre, iny aratyhynykemy. <sup>31</sup> Inytybyreny orotxu riyrenyre bederahy-ki. Kia wese Tyyriti-ki roire:

—Moisesi tamy orotxu riwahinyre biu-ribi.

<sup>32</sup> Jesuisi rirawyònyre: —Inatyhy tyhymy Moisesi aõkõ tamy riwahinyre. Waha dori biu-ribi orotxu tyhy adee riwahinyre. <sup>33</sup> Deuxu orotxu tahe irutyhymy inydee riwahinymyhỹre, biu-ribi diwahinymyhỹde. <sup>34</sup> Tahe raryberenyre: —Wanyrỹ, tiu kia orotxu bidiwahinymahãkre. <sup>35</sup> Jesuisi iximy rarybere: —Jiarỹ orotxu irutyhymy rare. Inyõ wadee kanakeki, tiu rama risaõtyhy. Inyõ riwatyhynykeki, tiu bee

risaõtyhy. <sup>36</sup> Adeereny heka rarybere: —Wamy tabitenyte, ihãrele tiwatyhynyõtenyte. <sup>37</sup> Ibutumy iny Waha wadee riwahinymyhÿre wadee kanakre. Tiu ixi-ribi ariteònyõtyhy. <sup>38</sup> Adobehede dori aõ ixideewimy aõma arotÿÿnykemy aõkõ. Wadeòdÿÿdudeewimy arotÿÿnykemy watxiwãhãre. <sup>39</sup> Tiu ariõnonyõtyhy wadee diwahinydeò kiaboho ibutumy ikonana txuu rubu-ribi ariixixanykre. Kia tahe wadeòdÿÿdu deewimy rare. <sup>40</sup> Inatyhymy Waha deewimy kia rare. Iny iRiòremy robireu, rityhynykeu, umy tuedeõna ritake. Ikonana txuu tahe rubu-ribi ariixixanykre.

<sup>41</sup> Jesuisi rarybere: —Jiarÿ biu ludu orotxu rare. Tai tahe judeu mahãdu aõbina binahakÿlemy rarybemyhÿre. <sup>42</sup> Kia wese rarybemyhÿre: —Kaa Jesusile rare. Jyje riòre rare. Tyby he ijoj eryna rare ise tule. Aõherekibo tii rarybereri biu-rubu nademy. <sup>43</sup> Tahe Jesuisi dirawyõnyde: —Tuu wamy ryberenyõmyke ayludurenymy. <sup>44</sup> Wadeòdÿÿdu iny wadee rayky-ò rarybemyhÿre namyhÿde. Kia wesele iny wadee kedehemy nykre, ikonana txuu tiiboho rubu-ribi ariixixanykre. <sup>45</sup> Deuxu rybedu Tyyriti-ki kia rybe rÿire:

—Deuxu ibutumy iny ribedeerydÿÿnykre. Tai tahe Waha-ribi iny rierymy roholamyhÿre, tii tahe wadee rehemynykre. <sup>46</sup> Inyõ Wahamy robiõhyymyhÿre jiarÿle tahe tuu rabimahãre, iribi anadeki. <sup>47</sup> Inatyhytyhymy adee rarybemahãre. Inyõ riwatyhynykeki, umy tuedeõnahakÿ tiiwanale ratxireri. <sup>48</sup> Jiarÿ orotxu wesemy jiarÿ rare. Umytuedeõna wahidÿÿdu jiarÿ rare.

<sup>49</sup> Boreny dori biu-ribi orotxu riyre bederahy-ki. Irabihyy ibutumy tiiboho ituerenyre. <sup>50-51</sup> Jiarỹ tahe biu ludu orotxu wese rare, inyõ tahe kia orotxu riykeki, tiu ruruõtyhy. Waumy ariwahinykre rubu-ò ibutumy iny òraruna òwydỹmy. Tamyreny umytuedeõna riwahinykre rubu-ò ibutumy iny òraruna òwydỹmy. Tamyreny umytuedeõna riwahinykre.

<sup>52</sup> Judeu mahãdu tahe txiõdỹna rybemy widee raryberenyre: —Timybo tadelemy inyboho riõwenyrenykemy wahe. <sup>53</sup> Jesuisi rirawyõnyre: —Inatyhytyhymy adee ararybekre. Kaiboho Deuxu Riõre Hãbutyhyhykỹde birõõbenykeki, umytuedeõna bitabenyõtyhy. Ihãlubu biõbenykeki, umytuedeõna-di aõkõ atxitenyteri. <sup>54</sup> Inyõ waderõdu wahãlubumy momodu tii umytuedeõna-di ratxireri. Tii tahe ikonana txuu rubu-ribi adiixixanykre. <sup>55</sup> Wade heka juhu irõnatyhy rare, wahãlubu tu monatyhy rare. <sup>56</sup> Inyõ wade rirokeki, wahãlubu riõkeki, wawana tiuhyy ratxireri. Jiarỹ tule tii-wana watxihyyreri. <sup>57</sup> Waha irumy ratxireri. Tii wadeõdỹdu rare iòraru-ki warumy watxireri. Tule waderõdu irumy ratxike waòraru-ki. <sup>58</sup> Jiarỹ biu ludu orotxu inatyhy jiarỹ rare. Iwese bederahy orotxu heka boreny riyrewesemy aõkõ jiarỹ rare. Ihãrele tahe ituerenyre. Inyõ riwaykeki, rexixahyymy rarekre. <sup>59</sup> Kia ibutumy Jesuisi rarybere Kafanaõ judeu dohodỹna-ki, rierynanyhyhỹreu.

<sup>60</sup> Iribi tahe Jesuisi-ò ijohona mahãdu rarybere: —Kia isira tyhyre iny rieryke. Inyõ heka kia rityhynyõtyhy.

61 Jesusile heka rexierymyhÿre tiiboho tuu rarybemyhÿreki, tahe tamy rÿÿraxire:

—Kaa aõbohe arabinadÿÿnyrenyke.

62 Tahe jiarÿ Deuxu Riõre Hãbutyhyhykÿ, ixyby biu-ò aròðekeki, timybo marybebenyke, kaiboho wamy bobibenykeki. 63 Deuxu

Tyytybytyhyle umytuedeõna riwahinymyhÿre. Umydetyhy umytuedeõna-di aõkõ rare. Urile adee rarybemahãre Deuxu Tyytybytyhymy rybena rare, adeereny umytuedeõna rare.

64 Tahe inyõ ayreny ludu riwatyhynyõreri. Jesuisi tahe juhoo-ribi rierymyhÿre mobo rityhynyõmyhÿre, tule mobo tatxiõdÿÿdumy rarekremy. 65 Jesuisi raryberehymy tii-wana: —Jiarÿ juhoo rarybewãhãre. Inyõ Waha wadee riteõnyõkeki tiu wadee kanaõtyhy. Tai heka tuu adee jiarÿ rarybere.

66 Kia rybe òraru-ki sõwemy taerydÿÿna mahãdu ririrenyre. Tahe roirenyre. 67 Tahe Jesuisi rÿÿraxire taerydÿÿna waðinatxi reurò mahãdu-ò.

Ka bexe boibenyõkre aõbo biwaribenyõkre aõbohe.

68 Tahe Simaõ Pedro rirawyõnyre. Wanyrÿ moobo aròirenykre. Kaile heka umytuedeõna rybe-di atxiteri. 69 Jiarÿboho ka aratyhynymahãrenyke.

Araeryrenyke ka, kai Deuxu-ribi hãbu õbitityhymy atximahãte. 70 Jiarÿ aratarenyke waðinatxi reurò inymy erydÿÿna mahãdumy.

Ihãre tahe inyõ ratximyhÿre diaboõ heka tii rare. 71 Jesuisi tahe Judasi Isariõmy rarybereri. Iwò inatxinamy wahe.

Simaõ-Isariõ riõre tii rare. Judasi dori Jesuisi riwahinykremy ratxireri iòludu mahãdu-ò.



## 7

<sup>1</sup> Judeu mahādu Jesuisi rubudỹỹmy rurumyhỹre. Tai tahe Judeia bedede ludu hāwā-ò ralòõmyhỹre. Kalileia bedede hāwādile rariamyhỹre. <sup>2</sup> Tahe judeu mahādu worana bedehesi iòhòmy rỹimyhỹ. Kiani tahe heto riòre worana bedehesi rare. <sup>3</sup> Tahe Jesuisi seriòreboho tamy rarybere: —Make wa karibi Judeia mahādu bedede-ò aerydỹỹna mahādu dori aõwiihikỹ kai tewinyteò tuu robikemy. <sup>4</sup> Aõwiihikỹmy tewinyteri, tai tahe ixinamy iny tuu ibutumy robikre. Ibutumy iny ixierysymy tahõtinyteri-wana urile iny lau iwòteõmy aõna aõna wiwiihikỹ. <sup>5</sup> Jesuisi seriòre mahādu tule rityhynyõre. <sup>6</sup> Jesuisi tahe dirawyònyde: —Wiji araõkre wabededỹỹnanamy dori tuu reaõmy ratxireri. Kaiboho tahe adohotalemy bòike. <sup>7</sup> Bedede ludu mahādu iny dori aluurenyre, tahe waderamy rekoarenyre. Iòrarunamy dori jiarỹ tamy rarybemahāre, ibinatyhyremy. <sup>8</sup> Kaiboho boibenyke worana bedehesi-ò. Jiarỹ tahe wiji araõkre, wabededỹỹnanamy reaõmy doimyhỹde. <sup>9</sup> Kia tahe Jesuisi tamyreny rarybere. Tahe Kalileia-ribi Jesuisi ròhònyõmy rỹimyhỹre.

<sup>10</sup> Tahe iseriòre roirenyre worana bedehesi-ò. Idi tahe tule tii rare iherenymy itỹnyny aõkò wahe, wasimy inyõ tuu robiheny. <sup>11</sup> Judeu mahādu tahe Jesuisi riijemyhỹre worana bedehesi òrake-ò. Rarybemyhỹre: —Titxibo tahe tii ratximyhỹre. <sup>12</sup> Jesusimy rybe ixitxiòdỹỹna ròhònyre inysòwehekỹy-ki. Inyõ heka awimy tuu rarybemyhỹre. Ijõ tahe ibinamy tuu rarybemyhỹre, tii iny itxenadỹỹdu raremy. <sup>13</sup> Inyõ tuu rarybeõhyymyhỹre ibutumy ijohonamy judeu mahādu

lau ruberureki.

<sup>14</sup> Worana bedehesi tya-ki Jesuisi Deuxu dohodỹna heto-ò ralore ribedeerynykemy. <sup>15</sup> Ribedeerynyreu tahe judeu mahãduõ ijõ-ò rarybere: —Timykibo he kia ritidỹna rierymy tuu rarybemyhỹre. Rierykõ ihãrele iny rierynanymyhỹre. <sup>16</sup> Tahe Jesuisi dirawyònyde: Waerydỹna-di aõkõ rebedeeryre, Deuxu wateòdỹdu rybe-di wahe. <sup>17</sup> Inyõ Deuxudeewimy ratxikeki, tii rierykre aõerydỹnabo òbitimy ratxireri. Tii rieryke Deuxu-ribi aõbo rarybereri ada ixi-ribi rarybereri. <sup>18</sup> Iny ixi-ribi rarybekeki, tiile rexiloosònanyke. Tahe iny iteòdỹdumy rarybekeki, tii tahe inatyhy rare. Tii inatyhymy òbiti rare. <sup>19</sup> Moisesi adee bede ywina riwahinyre: —Tahe kaibohoõ tetyhynyõhymahãtenyete. Tai tahe aõherekibo biwarubunyky atxitenyteri. <sup>20</sup> Tamy inyõ dirawyònyde. Kaita itxýteteri. Inyõ ka ararubunyky aõkõ ratxireri. <sup>21</sup> Jiarỹ inyõ reteytenyre sabado txuu tahe kaiboho wadi bede teòtiinytenyete. <sup>22</sup> Boholake, Moisesi bede ywina arateònyke ariòre ritòtyky aròkemy resynanyky. (Boboho tahe kia tuu ritelenyre Moisesi aõkõ.) Tahe notyky resyna txu rỹikeki, tuu tewinyete sabado txu hãrele. <sup>23</sup> Kia sabado txu biwinybenykeki Moisesi bede ywina riywinyky, tahe aõherekibo wadee taykarananyteri hãbu sabado txu reteytenyeki. <sup>24</sup> Aõ òbitimy aõkõ rare, òbitimy tahõtinyterikile. Òbitinale-di maraykynybenyke.

<sup>25</sup> Ijõ Jerusalẽ hãwã ludu mahãduõ rarybere:

<sup>26</sup> —Kia rarybemy rỹirerile, tii irubudỹmy

rexinohõtinyreri. Beteheke. Butumy ijohonanamy kia rarybemyhÿre. Ihãrele taheka inyõ tamy rarybeõhyymyhÿre. Wedu mahãdu rõhõtinyinymyhÿre: —Ina aõkãbo Kristumy inatyhymy tii rare.

<sup>27</sup> Inyboho tahe rierymyhÿre titxiribibo tiõ namyhÿde. Kristu Deuxu deòdÿÿna tahe kanakeu, inyõ tahe rieryõtyhy titxiribibo kanake. <sup>28</sup> Jesuisi tahe Deuxu dohodÿÿna heto-ki ribideerynymyhÿreu rarybere: —Kaiboho tiwaerytenyete, titxiribibo anade tule teerytenyete. Tahe wateòdÿÿdu teeryõtenyete. Teròwmy heka jiarÿ anade. Tule tii inatyhytyhymy rare. <sup>29</sup> Iribi jiarÿ anade Tii riwateònyre, tai jiarÿ tii reeryre.

<sup>30</sup> Inyõ riijemyhÿ riròtenykemy. Tahe rimyõhyre ruberureki, ibededÿÿnanamy aõkõ bede rÿireki.

<sup>31</sup> Iny sõwehekÿ-ribi sõwemy iny rityhynyre. Tahe inyõ rarybere: —Kristu Deuxu deòdÿÿna iratyre aõna aõna wiwihikÿ riwinykemy tahõtinyteri. Aõkõre, tii dori inatyhymy Kristu rare. <sup>32</sup> Fariseu mahãdu kia-ò roholareu, tahe wii ributunyre xiwe wahidÿÿdu wedu mahãdu-wana. Tahe tiibocho soldadu mahãduõ riteònyrenyre Jesuisi rimyky. <sup>33</sup> Jesuisi tahe tamyreny rarybere: —Urihimyò umyreny-wana watzikre, idi ta aròðsekre wateòdÿÿdu-ò ixyby. <sup>34</sup> Kiaboho biwaijebenykre, waki mahabenyõtyhy. Titxibo watzireri kia-ò heka bitehemynyõtyhy. <sup>35</sup> Judeu mahãdu tahe widee rarybere: —Titxiwexe tii rakremy ihÿre, tuu rokobirenyõtyhy tai rakaharenyõtyhy, myÿ rarybemyhÿre wahe: judeukõdu mahãdu bede-ò aõbo rakremy ixi-di ratxireri. Tai ribedeerynykemy, judeu

mahādu-wana rasỹnykremy. <sup>36</sup> Timybohe rarybere: —Waki mahabenyõtyhy, titxibo watzireri-ò behemyhyõtyhy, myỹ rarybereri.

<sup>37</sup> Ihewotxu worana bedehesi aõnihikỹtyhy rare. Jesuisi iu rexiukỹnyre rarybekemy: —Inyõ be-momy risakeki, wadee kanake, riõke. <sup>38</sup> Inyõ ri-watyhynykeki, Tyyritina-ki kia wese rybe rỹire:

—Iwo-ribi benihikỹ iru ròhònyke.

<sup>39</sup> Iu Jesuisi kia rarybereu, Deuxu Tyytybytyhy aõmy dỹỹnanamy rarybere. Iny dori rityhynykeki, iwo-ò Deuxu Tyytybytyhy ralòke. Urile tahe Deuxu Tyytybytyhy riwahinyõmy rỹire. Jesuisi dori ròseõre biu-ò. <sup>40</sup> Tahe roholare mahādu tahe rarybere: —Ka heka hābu Deuxu Rybedutyhy rare. <sup>41</sup> Ijõ tahe rarybere: —Tii Kristu rare. Ijõ tahe rarybere: —Kristu aõkõ Kalileia bede-ribi dori tii rareri. <sup>42</sup> Tyyritina rybe-ki roire: —Kristu, Davi sỹ-mahādu ribi kanakremy. Belẽ hāwā-ribi; titxibo Davi rasỹnyre-ribi. <sup>43</sup> Tai tahe wiwese wese aõkõ rōhõtynyrenyre Jesuisi-di. <sup>44</sup> Inyõ riròtenykemy ixi-di ratximyhỹ, ihārele tahe inyõ rimyõhyre.

<sup>45</sup> Tahe soldado mahādu ròðsemy rare rimyõhyylemy fariseu mahādu-ò xiwewahidỹỹdu mahādu wedu-ò. Tahe soldado-ò rỹỹraxirenyre: —Aõherekibo tedyõteri. <sup>46</sup> Tahe dirawyònyde: —Timybo inyõ kowa hābu wesemy rarybeõhyre rybe iwitxira wihikỹmy tii rarybere. <sup>47</sup> Tahe fariseu mahādu rarybere: —Kaiboho aõbo tule araitxenanyrenyra. <sup>48</sup> Inyboho mahādu reny-ribi moõ rityhynyõhyymyhỹre, fariseu mahādu wahe, wedu mahādu wahe. <sup>49</sup> Inyõ rityhynyre, tahe tiiboho Moisesi bede ywina

rieryõre tai Deuxu aõhõkỹmydỹñana-txi idi rehukre. Aõhõkỹmydỹñana-ò ritamadỹñnykre. <sup>50</sup> Nikodema iyreny-ki ratximyhỹ. Fariseu mahãduõ tii rare, juhoo Jesuisi rarað rare wahe. Tii heka rarybere imahãdu-ò. <sup>51</sup> Juhoo roholamyhỹre aõhebo rotỹñnyrað wahe idi tahe ibinakeki riròtenykremy riijemyhỹre. Kia tahe iny bede ywinareny rare. <sup>52-53</sup> Tahe rirawyònyrenyre: —Kai wa tule Kalileia mahãduõ atxiteri. Tyyriti-ò beteheke timybo rarybereriò: —Kalileia-ribi rybeduõ ròhònnyõtyhy wahe.

## 8

<sup>1</sup> [Tahe ibutumy he tasỹ-ò reareare. Iu tahe Jesuisi rare Oliveira hãwãlò-ò. <sup>2</sup> Biura-di tahe dòòsede Deuxu dohodỹña heto-ò ixyby. Sõwemy iny tamy rare; Jesuisi ronyre; ribedeerynyre. <sup>3</sup> Hãwyyõ ratximyhỹ hãbu wixiraõ-wana wasimy ratximyhỹ. Tahe inywixiraõ itxireny reare. Tai tahe Deuxu rybe erydỹñdu mahãdu fariseu mahãdu-wana hãwyy didyde Jesuisi-ò. Tahe hãwyy-ò rarybere rỹikemy iny sõwehekỹy-ki. <sup>4</sup> Tahe raryberenyre Jesuisi-ò: —Bede erydu: —Kahãwyy tỹwe rare inyõ itxi reara. <sup>5</sup> Iny bede ywina Moisesi riwawahinyré tahe rarybere mana-di rurumyhỹkemy. Tahe aõmybo kai mynarybeke. <sup>6</sup> Tiiboho kiamy rarybere Jesuisi riurihire timybo rarybekemy. Tai tahe ibinamy tamy rarybekemy idi ratxireri. Jesuisi tahe suò resera ròritidỹñkemy tebò-di suki riritinyra. <sup>7</sup> Tahe ritỹñraxinyhy ihỹmyhỹ. Tahe Jesuisi rỹire; rarybere: —Inyõ òrarukõmy ratxirerile, tii mana-di juhoo tamy rehukre. <sup>8</sup> Ixityrele sỹ

Jesuisi ròritidỹyre suò. <sup>9</sup> Kia rybe-ò roholarenyreu, tahe rexitarenyre sohoji sohojilemy, tarayky dori ribinadỹnyrenyra. Matuari mahãdu tahe juhUU rexitare. Ikonanatyhy dori rare, tahe Jesuisi hãwyywanale tai rỹire. <sup>10</sup> Jesuisi retehere: —Hãwyy sohojilemy robire rỹrãxire tamy: —Hãwyy, titxibo mana-di arubudỹmy rybedu mahãdu rirahura. Inyõ aõhe arasỹnyõhyra. <sup>11</sup> Tahe dirawyõnyde: —Anokõre, Wahĩ. Tahe Jesuisi rarybere: —Jiarỹ tulere! Mahe, òraruna-txi tahe ixiby ixẽmy.]

<sup>12</sup> Ixityre Jesuisi rarybere tamy: —Jiarỹ wabede loosõna rare. Inyõ wahemy kanakeki, bedede luru-ki rariaõtyhy. Tii heka loosõna-di tarayky-ki rarekre. <sup>13</sup> Tahe fariseu mahãdu tamy rarybere: —Aõkõre, kai wa iximy tarybeteri tai tahe arybe inatyhymy aõkõ rare. <sup>14</sup> Jesuisi dirawyõnyde: —Inatyhymy iximy rarybereri jiarỹ, tahe warybe inatyhy rare, jiarỹ dori reeryre titxiribibo anade, tule tiobo arakre reeryre. Kaiboho tahe kia teeryõtenyte. <sup>15</sup> Kaiboho waywisidỹmy tadiòlõnyte, ihãre tahe òbitimy tiwaywinytenyõte tiwaerytenykõteki. Tahe jiarỹ inyõ reywinyõreri. <sup>16</sup> Jiarỹ inyõ ariwinykeki, waywisidỹna tahe òbiti rare. Jiarỹ dori ixivanale aõkõ rare. Waha, wadeòdỹdu wawana raremyhỹ. <sup>17</sup> Abede ywina-ki kia rybe riritinymy rỹimyhỹre: —Inatxi hãbumy wiwesehyylemy rarybekeki kia tahe inatyhy rare. <sup>18</sup> Jiarỹ iximy rarybemahãre tule Waha wadeòdỹdu wamy adeereny rarybemyhỹre. <sup>19</sup> Tahe tiiboho Jesuisi-ò rỹrãxirenyre: —Titxibo boo ratximyhỹre. Jesuisi rarybere: —Kaiboho tiwaerykõmahãtenyte, Waha

tule teeryõmahãtenyte. Kai biwaerybenyõkeki, tule Waha bierybenyõtyhy. <sup>20</sup> Kia Jesuisi rarybere Deuxu dohodỹna hetowo-ki, iubeweri yrubudỹna ube-ki. Tahe inyõ rimyõhyyre, ibededỹnanamy aõkõ bede rỹireki.

<sup>21</sup> Iribi tahe ixityre tamy rarybere: —Jiarỹ he arakre karibi. Kaiboho biwaijebenykre tahe aõrarurenydile burubenykre. Boiõtyhy titxibo arakre-õ. <sup>22</sup> Tai tahe judeu mahãdu widee raryberenyre: —Inatyhymy aõbo tii rexirubunykre. Tii raryberaki: —Titxibo arakremy boiõtyhy, myki tuu idi rõhõtynyrenyre. <sup>23</sup> Tahe Jesuisi rarybere: —Kaiboho kaludu toite; jiarỹ aõkõre, biu ludu rare. Kaiboho bede ludu toite, jiarỹ tahe kabede ludu aõkõ jiarỹ rare. <sup>24</sup> Tai heka adeereny rarybereri aõrarureny-di burubenykremy. Inatyhymy jiarỹ tii rare: —Iwese rarybere wesemy. Tahe kia warybe bityhynyõbenykeki, aõrarureny-di burubenykre. <sup>25</sup> Tahe tiiboho rỹraxirenyre Jesuisi-õ: —Mobo he tate. Jesuisi dirawyõnyde: —Timybo adeereny rarybewãhãre, juhuu wahe. <sup>26</sup> Jiarỹ sõwemy rỹire aõna aõnamy umyreny ararybeke umyreny ariywinyke ta ararybekre Waha tuu wadee rarybelemy. Tii diwateõnyte tii inatyhymy rare. Irybelemy bede iny-õ ararybekre. <sup>27</sup> Rieryõhyyre tamyreny rarybere, tybomy. <sup>28</sup> Kaiboho heka biwatamadỹnybenykreu, bierybenybenykre mobo jiarỹ rare. Tule ixi-ribi aõkõ aõna aõna rewinywãhãre bierybenykre; tule iwese Waha riwaerynanamyhỹre wese, rarybemahãre. Kia tule bierybenykre. <sup>29</sup> Wateòdỹdu wawana

raremyhỹ. Iximy riwariõtyhy, jiarỹ tamy wimy rewinyhyymahãreki. <sup>30</sup> Kiamy tarybe rahudi tahe, sõwemy iny rityhynre.

<sup>31</sup> Judeu ityhydỹdu mahãdu-ò Jesuisi rarybere: —Kaiboho warybe tyhy-di mohõtinybenyhyykeki, inatyhymy watyhydỹdu waheludumy boibekre. <sup>32</sup> Inatyhyna tahe bierybenykre. Kia dori aratarenyke, deòdumy aõkõ boibekre. <sup>33</sup> Dirawyònydenyde aõkõre inyboho Abraõ riòkõre roire, tiu heka modeòdumy roirekõmahãre. Timybo tarybeta: —Deòdu-ribi riwatakemy. <sup>34</sup> Tahe Jesuisi tamy rarybere inyõ òraru-di hyy rexiòrarunykeki, ti òraruna deòdu wese hyyle rare. <sup>35</sup> Deòdu heka heto wedu ijoihyymy aõkõ rarekre. Iwedu ixinamy rakre. Riòre tahe ijoihyymy rare. <sup>36</sup> Tahe Deuxu Riòre heka ixinamy arateònykeki, tiu òraruna deòdu wesemy ixyby bonybenyõtyhy. <sup>37</sup> Abraõ riòkõre inatyhymy toite. Kia tahe reeryre. Ihãrele tahe biwarubunybenykemy atxitenyteri warybe dori araykywo-di aõkõ ratxireri. <sup>38</sup> Waha-wana ranymahãu, aõmybo rabire, wiji tuu rarybereri. Kaiboho tule boo-ribi tabitenyte tuu tewinytenyteri. <sup>39</sup> Rirawyònyrenyre: —Wahareny heka Abraõ rare. Jesuisi rarybere: —Abraõ riòremy inatyhymy toite-wana, Abraõ aõmydỹnana iwesemy biwinybenyke. <sup>40</sup> Katahe warubudỹmy wadi atxitenyteri. Inatyhyna Deuxu-ribi raholaremy, adeereny rarybemahãre, tai tahe warubudỹmy atxitenyteri. Abraõ tahe tiu tahe tuu rotỹnyõtyhy. <sup>41</sup> Kaiboho heka borenityhy wesele tatỹnymahãtenyte. Dirawyònyde: —Aõkõre, jiarỹboho waxiriòre aõkõ



roire. Deuxuhyyle iny tybyreny rare. <sup>42</sup> Tahe Jesuisi rerawyõnyre: —Deuxu boo inatyhymy rare-wana inihe kaiboho waluurenyre. Jiarỹ dori Deuxu-ribi anade. Ixidee wimy aõkõ anade tii diwateõnyde. <sup>43</sup> Aõherekibo teerytenyõte warybe. Isiratyhyre aõbo ijohona. Aõkõre, ityhydỹỹ isirare adeereny. <sup>44</sup> Kaiboho Diabo riõre toite tamywimy biwinykemy atxitenyteri. Tii juhUU rubudỹỹdu hyy rare. Tii heka raruireri inatyhywesehekỹle wahe. Tii ruidu rare. Ruiwedu tii rare. <sup>45</sup> Kaiboho heka tiwatyhynyõhyyamahãtenyte inatyhyna dori jiarỹ rarybemahãre. <sup>46</sup> Inyõ inihe wamy rarybeõtyhy jiarỹ õrarudu raremy. Adeereny inatyhynamy rarybereri. Aõherekibo tiwatyhynyõteri. <sup>47</sup> Iny Deuxu-ribi ratxireri, Deuxu rybe roholamyhỹre. Kaiboho Deuxuhõrõ aõkõ toite. Teõdu aõkõ toite. Taita warybe-õ taholaõteri.

<sup>48</sup> Jesuisi-õ tiiboho dirawyõnydenyde: — Inatyhymy rarybewãhãrenyre. Kai Samaria mahãdu tate. Kaludu mahãdu aõkõ tate. Kai tyytybybina dire. <sup>49</sup> Jesuisi rirawyõnyre: —Aõkõre, tyytybybina-di aõkõ watzireri. Waha tahe rewowydynywãhãre. Kaibohole tiwabinadỹỹnymahãtenyte. <sup>50</sup> Wowodyna ixi-di aõkõ reijereri. Waha tahe kia aõmydỹỹnanamy riywinykre, tii rierymyhỹre. <sup>51</sup> Inatyhytyhymy adee ararybekre: —Inyõ warybemy reõbykeki, tiu rubумы tii robiõtyhy. <sup>52</sup> Tai judeu mahãdu rarybere: —Katahe inatyhymyhe inydeereny aerysydỹỹna rỹira tyytybybina-di tate wahe. Abraõ tahe rurure; Deuxu rybedu tule. Tahe timybo kai tarybeta: —Inyõ warybemy reõbykeki

tiu rubu urihixinamy roiõtÿhy tamy. <sup>53</sup> Kai aõbo inytybyreny Abraõ ratyre awikemy aõbo ixi-di tahõtïnymahãte. Abraõ rurure Deuxu rybemy rybenadu amahãdu tule rurure. Mobo raremy he tahõtïnymahãte. <sup>54</sup> Tahe Jesuisi rirawyònyre: —Jiarÿ ixi-di wowydyna ariijekeki, tahe wawowydyna aõ aõkõmy rareke. Waha tahe riwawowydynymyhÿke aDeuxumy raremy tu tarybeteri. <sup>55</sup> Tahe aõkõ teeryòtenyete. Jiarÿ tate reerymahãre. Jiarÿ reeryõmahãremy ararybekeki, tai ruidumy rareki, iwese kaiboho toite wesele wahe. Tahe reerywãhãre, tule irybemy reòbymahãre. <sup>56</sup> Boreny Abraõ, wamy dobide, wabededÿÿnana kanakremy tuu dobide, wabededÿÿnana kanakremy tuu dobide tai tahe reysatyhymy rare. <sup>57</sup> Tahe judeu wedu mahãdu rarybere: —Kai 50 beòramy aõkõ atxiteri timyrekiibo tarybeta Abraõ tabitemy. <sup>58</sup> Jesuisi dirawyònyde: —Abraõ reaõule, Jiarÿ rarehyymahã.

<sup>59</sup> Tahe manadile rimymy reserenyre idile rirabunykemy. Jesuisi tahe rexiwòmÿ iribi ròhònymy rare, dohodÿÿna heto-ribi.

## 9

<sup>1</sup> Jesuisi rariamy rareu, tii robimy rare hãbu ruetàmÿ. Tii iruetàhàkÿmy ratohouãmÿ herinanyre. <sup>2</sup> Ierydÿÿna mahãdu rÿÿraxire tamy. Erydÿÿdu, aõherekibo hãbu ratohouãnyra iruetymy, ise tyby iòrarudireki aõbo ada taòrarumy aõbo. <sup>3</sup> Tahe Jesuisi rirawyònyre: —Tahe aõkõre tyby ise-ke aõkõ tiike aõkõ. Deuxu ruru wiji riteòsinykremy tahe tii kiawesemy rohonyre.

<sup>4</sup> Wateòdÿÿdu aõmydÿÿnanamy arotÿÿnyrenykemy watxiwãhãrenyre. Inyboho rikiwinyrenyke ibededÿÿnanamy rÿikreu, iwese txumy rÿikre wese tahe rummy heka kanakre tai raaõmysÿdÿÿõmyhÿre. <sup>5</sup> Kabede-ki watxiwãhãreòle tahe jiarÿy bede ludu mahãdu loosònatyhymy jiarÿy rare. <sup>6</sup> Tarybe rahudi tahe rarybexinyre suò idi tahe subororomy ritxienyre. Idi ta hãbu rueyre-ò subororo ritidire. <sup>7</sup> Tahe hãbu ruetà-ò rarybere: —Make wa bexisuhòke Silòe ahobe-di. Silòemy ninadu heka iny rybe-ki deòdÿÿna wesemy rare. Hãbu tahe rare, risuhore, dòòsede robimy. <sup>8</sup> Tahe ierydu mahãdu, tuu robire idi itxeredu mahãdu raryberenyre widee: —Kabe hãbu ixitòedÿÿdu rare, nierummy kowa-ki rexitòenymy ronymyhÿrele rare. <sup>9</sup> Ijõ rarybere tule rare. Ijõ rarybere: —Aõkõre, iwesele tahe iwitxirari. <sup>10</sup> Rÿÿraxirenyre tamy: —Timykibo arue reytera. <sup>11</sup> Rirawyònyre: —Hãbuõ Jesuisi inire. Tii tahe suboro borole riwinyra warue-ò ritidire. Tahe wadee rarybera: —Make Silòe ahobe-ò aõ bisuhòke. Tahe rare, resuhore, tai rabimy watxireri. <sup>12</sup> Rÿÿraxirenyre titxibo tahe tii rara. Rirawyònyra: —Reeryõre.

<sup>13-14</sup> Kia ruedeytena Jesuisi riwinyre sabado txuu, judeu aõmysÿdÿÿna txu aõkõ. Tahe tiiboho hãbu ridyrenyre fariseu mahãdu-ò. <sup>15</sup> Ixityre hãbu-ò rÿÿraxirenyre: —Timykibo riteytenyra. Tahe rirawyònyre: —Subororole waruetyre-ò ritidira, idi resuhòra, iule tahe retehera. <sup>16</sup> Tai tahe fariseu mahãdu-ò narybede: —Ka hãbu Deuxu-ribi aõkõ nade. Kakÿny sabadotxu bede ywina riywinyõhyyre. Tahe ijõ imahãduõ

rarybere: —Hãbu òraruduõ tiu deytenuwihikỹõ kia wesemy riwinyõtyhy. Tai tahe wiribi hitximy raraykynyrenyre. <sup>17</sup> Tahe ixityre hãbu-ò rỹỹraxire: —Tii arue arue riteytenyra: —Tai tahe timybo tuu marybekre. Hãbu rarybere: —Tii Deuxu rybemy rybeduõ rare. <sup>18</sup> Tahe judeu mahãduõ rarybere: —Ise-wana tybywana widee ararybekekile, arityhynykre. Tai riteònyre tybybohoòrysmy. <sup>19</sup> Rehemynyreu, tahe tamy rarybere: —Kaa aõbo ariòre rare. Inatyhymy aõbo iruetãmy reare. Timykibo tahe wiji robira. <sup>20</sup> Tahe tybyboho rirawyònyre. Inatyhymy wariòrereny rare. Iruetãlemy ka reare. <sup>21</sup> Reerykõrenyre timykibo retehera. Irueriraynyre dori, reeryõhyre. Tamy marybebenyke. Ibeòra dire ka, iximy relyyleke. <sup>22-23</sup> Tybyboho ruberumyhỹrenyre judeu mahãdu lau. Judeu mahãdu dori, rarybemyhỹre: —Inyõ Jesusimy rarybekeki, tii Kristu Deuxu deòdỹỹna raremy rarybekeki, tahe dohodỹỹnawo-ribi riteònykemy idi rỹira. Tai tahe hãbutybyboho kia wesemy raryberenyre. Tii ibeòra dire: —Tamy marybebenyke.

<sup>24</sup> Juhuu iruetãmy raremyhỹò ixityre ròtedỹỹmy rarybere. Òbiti rybe-di marybeke. Inydeereny tahe ka dori òrarudu rare. Tai tahe Deuxu biwowydynyke. Tahe tii rarybere: <sup>25</sup> —Tii òrarudu rare, reerykõre. Sohoji aõmydỹỹnana reeryre. Juhuu waruetãle heka reeryre, wiji tahe retehereri. <sup>26</sup> Tahe ixityre tamy rỹỹraxire: —Aõbo tii riwinyre. Timybo arue roire. <sup>27</sup> Hãbu rarybere: —Adeereny tuu rarybere tahe taholaõhytytenyta. Aõherekibo ixityre ijohonamy

tarybetenyteri. Ierydỹĩnamy boibekemy aõbo atxitenyteri. <sup>28</sup> Tuu raryberenyre aõbina binalemy. Kai heka iijoiõ atxiteri. Jiarỹboho Moisesi erydỹĩna jiarỹboho roire. <sup>29</sup> Deuxu Moisesi-ò rarybemyhỹre. Kiamy reeryrenyrene. Ka hãbumy tahe aõmy raholaõmahãreny, tiludubo rare. <sup>30</sup> Kia wa riwateytenyra bededõtĩdỹĩna urenana tii rare. Ihãrele tahe kaiboho teeryõmy tuu tarybetenyteri. Wadee kia ajuedena rare. <sup>31</sup> Deuxu wa òrarudu ixitòedỹĩna-ò roholaõtyhy. Kia reeryrenyrene. Tahe inyõ Deuxu rityhynykeki tamywimy rỹirakeki, kia-ò Deuxu roholakre. <sup>32</sup> Bede rexidelenyreu, inyõ roholatyhy iruetãmy raumynyrene heka reytere. Inyõ tiu riwinyõre, wiji tahe diwinyde. <sup>33</sup> Kia hãbu Deuxu-ribi nokõduõ aõkõkeki tiu aõ riwinyõtyhy. <sup>34</sup> Tahe fariseu mahãdu aõbinahakỹlemy tuu rarybere: —Kai uladumy teateu, òrarudutyhymy tate. Kai aõmybo biwabedeerynybenykremy aõbo wadireny tahõtinyteri. Tahe riteònyre dohodỹĩna heto-ribi. Ihyymy riteònyre.

<sup>35</sup> Kia-ò Jesuisi roholareu hãbu riijere tahe rỹĩraxire tuu: —Kai Deuxu Riòre Hãbutyhyhykỹ aõbo tetyhynyte. <sup>36</sup> Hãbu rarybere: —Mobo tii rare, Wanyrỹ, arityhynykemy watzireri. <sup>37</sup> Wamy wa tabita, jiarỹleheka watzireri. Adee rarybererile watzireri. <sup>38</sup> Tahe rarybere: —Wanyrỹ aratyhynyra he. Tahe hãbu Jesuisi riwowydynyrene. <sup>39</sup> Jesuisi rarybehyyra: —Jiarỹ anade kabede-ò iny ruetà aritobixidỹĩnykemy; tule robimyhỹre mahãdu ariruetadỹĩnykre. Iny òwydỹĩnamy anade. <sup>40</sup> Fariseu iòhòmny iribi

rỹimyhỹ roholare irybe-ò. Tahe tamy rỹĩraxire. Inatyhykõ aõbo ka jiarỹboho tule waruetàrenyre. <sup>41</sup> Jesuisi rarybere: —Aruetàmy ahãtenyteki, aòraruna-di aõkõ toite. Tahe tarybetenyte reerywãhã, rabiwãhãre. Tai aòraruhyy-di toite.

## 10

<sup>1</sup> Inatyhytyhymy adeereny ararybekre: —Inyõ budoeni yrubudỹĩna ijòtòbòna-di, ralòõkeki, tii tahe wasidu xiwatxidỹĩdumy rare, raòwònymy heka ralòmhyhỹre. <sup>2</sup> Ijòtòbòna-di ròtedu, tii budoeni-di itxeredutyhy rare. <sup>3</sup> Iu ijòtòbòna-ò rehemynymyhỹreu, ijòtòbòna ludu tamy riraynymyhỹre. Tule budoeni irybe rierymyhỹre. Sohoji sohoji-ò ininimy tamy ryrymyhỹre, tahe idi ròhònymy ridymyhỹre. <sup>4</sup> Ihõrõ ahana-ò ridyre, tii iko-ò rỹimy idi ramyhỹre. Riheludunymy idi raremyhỹ rierymyhỹreki irybe. <sup>5</sup> Budoeni ieryõdu riheludunyõtjyhy, irybe rieryõreki. Iny ieryõdu-ribi rahenykre. <sup>6</sup> Jesuisi tamy kia bede eryna ijyymy relyyre. Tiiboho tahe rieryõhyyrenyre timybo ibede erydỹĩnamy rororerimy.

<sup>7</sup> Tahe Jesuisi ritỹnynyre tamyreny: — Jiarỹ budoeni ijòtòbòna wesemy rãimahãre. <sup>8</sup> Ibutumy iny wakõule rehemynyre wasidu xiwatxidỹĩdumy rỹiramyhỹ. Wabudoeni ityhydỹĩdu wesemy rỹirerimy ihỹre. Tiiboho wasidurybe-ò roholaõhyymyhỹrenyre. <sup>9</sup> Jiarỹ ijòtòbòna wesemy rãiwãhãre. Inyõ wamy ralòkeki, tii heka tarasanaõmy rarekre. Iwese wabudoeni ralòmhyhỹre idi ròhònymyhỹre asi wiwihikỹmy riroximyhỹre wesemy, tule ityhydỹĩdu mahãdu rỹirakre, bedeòbyna wiwihikỹ ritakremy.

<sup>10</sup> Wasidu heka rubudỹmy nade, bedehudumy wasimy, jiarỹ tahe anade inyõ umytuedeõna ariwahinykremy, irutyhytyhy wihikỹmy wiji rỹirakremy. <sup>11</sup> Jiarỹ budoeni-di itxeredu wihikỹ rare. Ihyy ta waumy ariwahinykre terõwrenymy. <sup>12</sup> Inyõ budoeni-di itxeredumy deõdumy risỹnykeki, tii riwisinanyõtyhy, tii dori budoeni wedu aõkõ rare, deõdule rareki. Tahe irõdu brebunaõ tamy kanakeki tahe rahenyke iribi, tai ijõ rimyke, ihona tahe raõrunyke. <sup>13</sup> Deõdu heka rahenyke tii iwedu aõkõ rareki, tii aõmy aõkõ idi rõhõtinyinmyhỹre, iõwydimy aõkõ. <sup>14-15</sup> Jiarỹ heka itxeredu wihikỹ rare wabudoeni riwaerymyhỹre. Jiarỹ tule tii mahãdu reerywãhãre. Waha riwaeryre, tule tii reeryre. Iwesetyhyle wabudoeni-wana wii reerynyre. Iõraru-ki tahe waumy ariwahinykemy idi wãhãre. <sup>16</sup> Jiarỹ wabudoeniõ-di watxiwãhãre. Aõ kabede-ki aõkõ. Ibutumy aributunykemy idi watxireri. Tai tahe sohoji ijoihyylemy heka roikre. Ibutu-di itxeredumy ararekre. <sup>17</sup> Tai heka Waha waluure, waumy ariwahinykreki wahe. Ihãrele tahe ixyby idi arexiumydỹnykre. <sup>18</sup> Inyõ heka ixideewiõkeki riwarubunyõtyhy. Arexiwahinykre tamyreny riwarubunyrenykremy. Ixideewikreu, arexiwahinykre, tule waumy arimymy arexiixixanykre. Waha dori wadee rarybere tii ariwinykremy.

<sup>19</sup> Kia rybe õraru-ki judeu mahãdu rybe rexi-jeijeinyre. <sup>20</sup> Sõwemy iny ritxiõnymy rarybere: —Tii tyytybybina-di ratximyhỹre ada raitxỹtemy aõbo ihỹre. Aõherekibo tamy taholamahãtenyte. <sup>21</sup> Ijõ tahe rarybere: —Aõ tyytybybina-di aõkõ

rarybemyhÿre. Tyytybybina aõbo hãbu rueta riruedÿÿnyõtyhy.

<sup>22</sup> Jerusalẽ hãwã-ki heka beòrahyy rare. Worana bedehesi hetxina Tÿmyradÿÿna rÿire. <sup>23</sup> Salomaõ Ube-ki, Deuxu dohodÿÿna heto ubeõ-ki. <sup>24</sup> Jesuisi rariamy ihÿmyhÿ. Tahe judeu mahãdu rirurawonyre itÿÿraxidÿÿmy. Tiwese bededÿÿnananybo nohõtidihiyy bede ariwyrenykre. Kai inatyhymy Kristumy tate-wana, tahe manarybeke itÿnymy. <sup>25</sup> Jesuisi dirawyõnyde: —Rarybere wahe, tahe kaiboho tiwatyhynytenyõhyte. Inatyhymy ierysmy mohõtinybenykeki, waaõmydÿÿnana wiwihikÿ rewinyamahãre-di betehebentyke. Wahani-di kia rewinyamahãre. <sup>26</sup> Kaiboho tahe tiwatyhynyõlemahãtenyete, wabudoeni wesemy aõkõ toite. <sup>27</sup> Wabudoeni warybe rierymyhÿre, riwaheludunymyhÿre; jiarÿ heka ibutumy wabudoeni reerymahãre. <sup>28</sup> Tamy umytuedeõna rewahinywãhãre tiu heka ruruõtyhy. Inyõ waribi ridyõtyhy. <sup>29</sup> Waha wadee riwahinyre. Tii heka ibuturatyre rare. Inyõ iribi ritaõtyhy. <sup>30</sup> Jiarÿ Waha-wana sohojihyyle watxiwãhãre.

<sup>31</sup> Ixityre tahe judeu mahãdu mana-di rirubunykre idi rÿire. <sup>32</sup> Tahe Jesuisi tamyreny rarybere: —Jiarÿ sõwemy bedeòbyna inydee rewinywãhãre Waha ruru-di. Aõòrarukibo biwarubunybentykre. <sup>33</sup> Tahe judeu mahãdu rirawyõnyre: —Kai aõmydÿÿnana wiwihikÿle tewinyte. Kia òraru-ki aõkõ ijoi adi rÿireri mana-di arubudÿÿmy Deuxumy binatyhymy tarybeteriki. Kai dori hãbu tate, ihãrele Deuxumy texiniteri.



34-35 Jesuisi rarybere: —Abede ywina-ki ryberiti rỹire. Deuxu Rybe òbitihyomy raritinomy rỹire. Kiamy: —Jiarỹ rarybere: —Kaiboho Deuxu toite. Deuxu Rybe heka inyõ-ò diteònyde. Kia mahãdu tahe Deuxulemy rininire. <sup>36</sup> Deuxumy tiiboho rininirenyre-wana, aõherekibo wadee takyarananyteri jiarỹ tule Deuxu Riðrelemy rexininireki. Waha dori, riwatamy diwateònyde. Timykibo kaiboho tarybetenyteri Deuxumy ibinamy jiarỹ rarybererimy <sup>37-38</sup> Waha-ribi bedeòbyna ariwinyõkeki, biwatyhynybenyõtyhy. Tahe ariwinykeki, aõbo rewinyre-wana bityhynybenyke, biwatyhynybenyõke hãrele. Tai tahe bityhynybenomy boibeke jiarỹ Waha-wana wãhãre tule Waha wawana ratximyhỹre. <sup>39</sup> Kabedeu ixityre riijere Jesuisi rimyky tii rexitamy rexihedỹnyre.

<sup>40</sup> Jesuisi ixityre Jordaõ bero kowa weribi-ò reurore. Joaõ juhuhu ròsebedỹmyhỹò rare. Taile tahe tii raremyhỹ. <sup>41</sup> Tahe sõwemy iny tamy roirenyre. Tamy rarybere: —Inatyhymy Joaõ bedeòby iny itxerenamy riwinyõre. Tahe ibutumy tii Jesuisimy rarybemyhỹre, inatyhy rare. <sup>42</sup> Sõwemy heka taile Jesuisimy rityhynymyhỹre.

## 11

<sup>1-2</sup> Lazaru ibinamy roimyhỹ Betỹnia hãwã-ki. Marie, Marta-wana iseriðereny rare. Juhuu Marie Jesuisi-wana raremyhỹu, tii Jesuisiwa tyre-ò tarinalỹnyrehekỹõ ritxiwire, idi tahe tarade-di rirubudỹnyre. <sup>3</sup> Lazaru ibinamy roimyhỹki tahe tiiboho riteònyre Jesuisi-ò rarybekremy: —Wahĩ, abiòwa tyhy binanidikỹmy roireri.

<sup>4</sup> Jesuisi kiamy roholareu rarybere: —Kabinana hãwã Deuxu wowodynamy tamy nade. Tule riwawowodynamy jiarỹ dori Deuxu Riõre rare. Kabinina tahe rubuhyymy aõkõ tamy rỹike. <sup>5</sup> Jesuisi heka ibutumy iluurenyre, Marta, Marie, Lazaru-wana. <sup>6</sup> Iu Jesuisi rieryreu Lazaru webinaduna, tahe taile ratximyhỹre, rerihãrele inatxixumy. <sup>7</sup> Iribi tahe rarybere taerydỹỹna mahãdu-ò: —Ròkòirenyke ixiby Judeia bede-ò. <sup>8</sup> Tahe ierydỹỹna mahãdu tamy rarybere: —Erydỹỹdu aõherekibo ixibynomy tamy tarybeteri judeu mahãdu adi heka riwisỹnomy rỹimyhỹ mana-di arubudỹỹmy. <sup>9</sup> Jesuisi dirawyõnyde: —Txu heka waõinatxi òra bededỹỹnanamy rare. Aõhe inatyhy. Inyõ txumy rariakeki, tiu aõ òraru-ki reseõtyhy loosònamy dori ibutumy robimyhỹre. <sup>10</sup> Bede lurumy rariakeki tahe, aõ òraru-ki reseke, loosòna dori ihoõreki wahe. <sup>11</sup> Tahe ijõmy Jesuisi tamyreny rarybere: —Iny biòwareny rõrõmy roireri. Tamy arakre ariixixanykremy. <sup>12</sup> Tahe imahãdu rarybere: —Wanyrỹ tii rõrõmy roireri-wana bohe, reytekre. <sup>13</sup> Jesuisi heka rarybemyhỹ Lazaru rubumy roirerimy. Tiiboho tahe rõhõninyrenyre urile rõrõmy roirerimy. <sup>14</sup> Tahe Jesuisi ritỹnynytyhyra tamyreny: —Lazaru rurure. <sup>15</sup> Jiarỹ wa aòrarureny-ki wadeysamy watxireri tai watxiõraki. Ka tahe biwatyhinybenykre. Ròkòirenykre tamy. <sup>16</sup> Tome ierydỹỹna mahãduõ rare. Didimomy iniõre. Tamahãduõ rarybere: —Ròkòirenyke, tule tii-wana rukururenykremy.

<sup>17</sup> Jesuisi rehemynyreu, Lazaru inaubiòwatxumy

hãloo iwòdỹỹwo-ki roimyhỹ. <sup>18</sup> Betỹnia Jerusalẽ hãwã-ribi sohoji urihixinamy roire. <sup>19</sup> Judeu mahãduy-ribi sówemy doidenyde Marta Marieboho wotòenamy, iseriòrereny rurureki. <sup>20</sup> Marta Jesuisi kanakre rieryreu, tahe ròhònyre tii-wana witxi reakemy. Marie tahe tahetokile ronymyhỹ. <sup>21</sup> Tahe Jesuisi-ò Marta rarybere: —Wahĩ, kakile atxiberi-wana waseritxòre rurukòhykyra ikuny. <sup>22</sup> Ihãrele tahe rekeryre ibutumy Deuxu-kò bexitòenykeki, tiki adeke kidiwahinykre. <sup>23</sup> Jesuisi tahe tamy rarybere: —Aseriòre wa rubu-ribi kedexixakre. <sup>24</sup> Tahe Marta rarybere: —Rekeryre jikarỹ ikokunanatxu-ku rubu-ribi rexixakre, ibutumy ixixanatxu-ku. <sup>25</sup> Jesuisi rarybere: —Jiarỹ waixixanadỹỹdu rare, umytuedeõna wahidỹỹdu rare. Inyõ riwatyhynykeki, tii rubu-ki roire hãrele, kedexixakre. <sup>26</sup> Ibutumy irumy roirekeki, tiu rururenyòtyhy, tii dori riwatyhynyreki. Kai aõbohe kia tetyhynyteri. <sup>27</sup> Tii dirawyònyde: —Kohe, Wahĩ, aratyhynywãhãre. Kai Kristu tate, Deuxu ritxòretyhy. Deuxu tuu rarybereki, bedekò kanatekònyde wahe. <sup>28</sup> Tahe Marta ròsere Marie taseriòre-ò rarybere: —Inyhĩ rehemynyreri, kai makremy rarybereri. <sup>29</sup> Kiamy roholareu, tahe, wylemy rỹimy reare tamy rare.

<sup>30</sup> Jesuisi dori hãwã-ò ralòõlemy raremyhỹ Marta tamy raryberekile raremyhỹ. <sup>31</sup> Tii rỹimy ròhònyreu, judeu mahãdu tuu robire. Tahe riheludunyre, wabede-ò robukremy raresỹny tamy roholare. <sup>32</sup> Marie rehemynyre Jesuisi-ò. Tahe tii tuu robireu, resere iko-ò,

tahe rarybere: —Wahĩ, kaki atxiberi-wana ikuny waseritxòre rurukõhykyra. <sup>33</sup> Jesuisi Marta ibru-di tule judeu mahãduhi-di retehereu tule tii rabadewonihikỹre. <sup>34</sup> Iule Jesuisi rỹĩraxire: —Titxiwexe tii tetiditenyte. Tiiboho rirawyònyre: —Wanyrỹ, manake itxeremy. <sup>35</sup> Jesuisi tahe rahinyre. <sup>36</sup> Tai tahe judeu mahãduõ rarybere: —Betehebenyke sõwemy heka tii Lazaru luure. <sup>37</sup> Ijõ tahe rarybere: —Tii iny ruetà riteytenyre. Aõherekibo Lazaru irumy ratxireriule riteytenyõra.

<sup>38</sup> Jesuisi ixyby tawo-ki bederiòtiinyre. Tahe rari-amy rare wabede-ò Lazaru suiwodỹwo-ò roire. Mana-di tahe ritxiotòbònyre. <sup>39</sup> Tahe Jesuisi rarybere: —Mana bitake Marta tahe iseriòre rarybere: —Wahĩ, rarònyreri wahe inakubikòwa tx-umy dokuri txuu idi rỹira. <sup>40</sup> Tahe Jesuisi rarybere: —Rarybere taheka, bityhynykeki, Deuxu rurumy bobike. <sup>41</sup> Tahe mana iribi ritarenyre. Jesuisi retehere biu-ò rexitòenyre: —Umy reàlãm y wahe watxireri kai wadee taholataki. <sup>42</sup> Wadee taholahyy atxiteri mahãte: —Kia reeryre, kata inysõwehekỹ òraru-ki kiamy rarybera adee, tai tiiboho rityhynyrenykeny wahe, kai tiwateònyteki. <sup>43</sup> Kia rexihureu tahe ryryre: —Lazaru, bodohonyke wa ahana-ò. <sup>44</sup> Kia rurumy roimyhỹ-ribi tahe dòhònyde. Iwa heka tebò-wana widee ritỹtenyleny roimyhỹ. Irati tahe tyybese-di ritỹtenymy ihỹmyhỹ. Jesuisi rarybere: —Biesebenyke wa ixinamy rake.

<sup>45</sup> Tahe judeu mahãduy-ribi, Marie Martaboho roraludu mahãdu, aõbo Jesuisi riwinyremy robireu tahe, rityhynyre. <sup>46</sup> Ijõ tahe fariseu

mahãdu-ò roirenyre tamy relyykemy aõbo Jesuisi riwinyremy.

<sup>47</sup> Iribi tahe xiwe wahidỹỹdu wedu, fariseu wedu mahãdu-wana heka ywisidỹỹna mahãdu ributunyre. Dohodỹỹna mahãdu wedu heka imahãduni rare. Tahe inyõ rarybere: —Ka hãbu heka aõwiihikỹ sõwemy diwinymyhỹde. Aõhebo he rokotỹỹnyrenykre. <sup>48</sup> Tiihyyle riwinymy rarekeki, heka ibutumy rityhynykre. Idi tahe Roma hãwã mahãdu soldadu kanakre iny riòlòdỹỹnyke inysỹ rahurenkykre. <sup>49-50</sup> Kaifa imahãduõ rare. Kabeòrau tahe tii ibutu xiwena wahidỹỹdu wedu rare. Tahe tii rarybere: —Kaiboho aõ teeryõhyytenynte. Hãbuõ tahe rurukre ibutu inydee. Tai tahe ibutu iny itueõtyhy. <sup>51</sup> Kia heka irayky-ribi aõkõ ròhõnyre. Deuxu irayky-ò ritidire, tii dori xiwena wedu tyhy rare kabeòrau. <sup>52</sup> Kiamy rarybereu, tahe Jesuisi rubunamy rarybereri. Jesuisi dori ibutumy judeu mahãdu dee rurukre. Tamy sohojile aõkõ rurukre. Tahe sohoji mahãduòle rabutukre Deuxu riòre bede bedemy rỹira mahãdu wahe. <sup>53</sup> Itxuule tahe Jesuisi rubudỹỹmy rõhõtynyrenyre.

<sup>54</sup> Tai tahe ihãwãy-ki rariaõre, Judeia mahãduy-ki. Tahe iribi rexitare bederahy-ò iòhòmy. Hãwãõ-ò heka rare, Efraĩ heka inire. Taile taery mahãdu-wana ihỹmyhỹ. <sup>55</sup> Judeu mahãdu worana bedehesi iòhòmy rỹimyhỹ Pascoa heka inire. Ritelenykõule heka sõwemy roirenyre Jerusalẽ hãwã-ò, tai rexiwinyrenyky iwese bede ywina rarybere wese Pascoakomy wahe. <sup>56</sup> Sõwemy iny Jesuisimy robikemy rỹimyhỹ. Tahe Deuxu dohodỹỹna hetowo-ki widee rarybemyhỹre

tahe rarybere: —Kanakre aõbo Jesuisi worana bedehesi-ò. <sup>57</sup> Xiwena wedu fariseu-wana juhuu inyõ rarybemahãre: —Inyõ Jesuisimy robikeki, tuu wadeereny kanarybekre, tii ramykremy wahe.

## 12

<sup>1</sup> Jesuisi rare Betÿnia hãwã-ò Pascoa worana bedehesi rÿikrekoki. Debòsohoji txumy rauhenymy rÿimyhÿ tamy. Tai heka Lazaru rasÿnymyhÿre rubu-ribi rexixare-ribi wahe. <sup>2</sup> Martaboho tahe rÿsÿna wiutãdãna riwinyrenyre Jesuisideewina. Lazaru Jesuisi-wana riroxikremy ronymyhÿ. Tahe Marta tamyreny rÿsÿna riwymyhÿ. <sup>3</sup> Marie tahe sõwemy aderõna lÿnyre-di ratximyhÿ, iòwyhykÿre heka. Tahe tii Jesuisiwatyre ritxiwire idi tahe taradedile risuhore. Heto tahe tÿnyrehekÿlemy roire. <sup>4</sup> Judasi Isariò tule Jesuisi erydÿÿnaõ rare tii tai ratximyhÿ. Tii Jesuisi rityhenykremy tii raremyhÿ ihewo-ribi. Tii tahe rarybere: <sup>5</sup> —Kaa aderõna heka iòwyhykÿ rare. Aõherekibo idi tahonyõte nieru idi bitakemy iny aõkõ mahãdu-ò nieru biwahinykemy. <sup>6</sup> (Judasi heka iny aõkõ mahãdu luu aõkõ rare. Erydÿÿna mahãdu nieru rubudÿÿdu tii rare. Kia nieruõ tahe ixideele ritosinymyhÿre. Tai tahe aderõna òwy ixidee ributunykemy idi ratximyhÿ). <sup>7</sup> Tahe Jesuisi rarybere: —Ixinamy wawatyre ritxiwike, wahãloo-ò waherina heka riryrymy tuu ritxiwireri. <sup>8</sup> Kaiboho heka aõu biwiõhenanymy ahãbenyke iny aõkõ mahãdu awanarenny dori rarehyymy rarekre. Jiarÿ tahe kaki aratxihyyke aõkõ rare.

<sup>9</sup> Judeu mahãdu Jesuisi rehemynyneriò roholare. Tahe sõwemy iny tamyreny nade itxeremy. Tule Lazaru-ò itxeremy nade rubu-ribi rexixareki. <sup>10</sup> Tai tahe xiwewahidỹỹdu mahãdu wedu tule Lazaru rubudỹỹmy rarybere. <sup>11</sup> Lazaru òraru-ki dori sõwemy judeu wedu Jesuisi rityhyre.

<sup>12</sup> Itxubiõwau tahe Jesuisi nade Jerusalẽ-ò kia-ò tahe roholare ibutumy worana bedehesi ludu mahãdu. <sup>13</sup> Tai tahe roirenyre tii-wana witxi reakemy horeru riwyre ityre-di kanakre. Ryryrenyre Jesuisi-ò: —Waiòlòreny, kai arawowydynyneri, kai bedeòbydỹỹdu tateki! Kai Deuxuni-di tateri. Kai judeu Iòlòtyhy tate. <sup>14</sup> Jesuisi nade jumenta riòre tyre-ki, tuu dori ihetxina tyyriti-ki roire wesemy. <sup>15</sup> Kiamy wahe roire:

—Judeu riòre mahãdu uritere brebuõmy atximahãbeny aiòlòreny dori kanakre jumenta riòre tyre-ki.

<sup>16</sup> Iery mahãdu kia rieryõhyre juhUU. <sup>17</sup> Iribi tahe tõhõti itxi reare ritidỹỹna hetxina-ki roiremy, Jesuisi biu-txi ròõemy rareu wahe tõhõtireny itxi reare. Tule sõwemy iaõmydỹỹnana rybe hetxina-ki riritinymy rỹimyhyre. Kia-di tahe idi tõhõtireny reare. <sup>18</sup> Inyõ itxeredu heka Lazaru ixixanamy relyre. Tai tule iny sõwemy doidenyde. Kia Jesuisi riwinyreò heka roholarenyre. <sup>19</sup> Tai tahe fariseu mahãdu widee raryberenyre: —Ibutumy ihemy roirenyre. Timyõre, aõhe heka rikisỹnyrenyõtyhy.

<sup>20</sup> Inyõ worana bedehesi-ki grego rybedu mahãduõ ratximyhỹ. Tii tai Deuxu reàlakemy ratximyhỹ. Tii Besaida hãwã ludu-ò Kalileia

bede luduõ ratximyhỹ. <sup>21</sup> Tahe grego rybe mahãdu tamy rarybere: —Wanyrỹ, jiarỹboho, Jesusimy arobikemy watxirenyreri. <sup>22</sup> Filipi tahe Andre-ko relyyre. Ta wiwana roirenyre Jesuisi-ò. <sup>23</sup> Jesuisi rarybere: —Aõkõra, Wabededỹnana iòhòra Deuxu Riòre Hãbutyhyhykỹ rubuna-ò, wahe. <sup>24</sup> Inatyhymy adeeremy ararybekre: — Jiarỹ alòbòròna rijuxunymyhỹre wesemy aresekre suò, arurukremy. Aruruõkeki ixivanahyyle ararekre. Arurukre-wana sòwemy araratynykre. <sup>25</sup> Inyõ ixiluukeki heka, ruruke. Kabede-ki tahe ixiluuõkeki, tii rexywinymy umytuedeõna-ò ratxike. <sup>26</sup> Inyõ wadeòdumy ratximyhỹkeki, tii riwaheludunyke. Tai titxibo aratxikeò tii wawana ratximyhỹke. Inyõ wadeòdumy rareke-wana, tii Waha riwowydynykre.

<sup>27</sup> Katahe wabedewonihikỹmy watxireri. Timybo ararybekre, Waha, kia rubu aõmydỹnana-ribi biwatake. My òsana arexitòenykre. Aõkõre, kiaòle heka kabede-ò anade. <sup>28</sup> Waha, anityhy-ò iny riwowydynykemy watxireri. Iule tahe rybeõ-ò roholarenyre: — Kia rotỹnyre ihãre ta ixityre tuu rotỹnykre. <sup>29</sup> Tahe iny sòwehekỹ kia rybe-ò roholare. Tahe rarybere: —Biumytxyle rare. Tahe ijõ rarybere. Aõkõre ýju rare. <sup>30</sup> Tahe Jesuisi rarybere: — Waòraru-ki aõkõ kia rybe rỹireri, aòrarureny-ki, tamy boholabenykemy. <sup>31</sup> Wiji tahe ywisidỹna kỹnyikre, bedemy iny rỹira mahãdu-ò. Kia mahãdu iòlò, Satanasi, kanahitxidỹkre. <sup>32</sup> Iu jiarỹ itxeò-ki riwaukokreu, ibutumy iny heka ixidee adiwiutàdànykre riwatyhynykremy. <sup>33</sup> Iu



tii kia rarybereu, tarubuna ritỹnnyre timybo rurukre. <sup>34</sup>Iny sõwehekỹ dirawyõnyde: —Jiarỹboho raholarenyre bedede ywina-ò. Tii rarybere: —Tiiemy Kristu rarehymy rarekre. Timybo kai tarybeteri: —Biwaukokremy. Mobo tahe Deuxu Riòre Hãbutyhyhykỹmy tuu tarybeteri. <sup>35</sup>Tahe Jesuisi dirawyõnyde: —Urihimyòle loosòna awana rariamy ratxireri. Idi atxiteriule idi mariake, bedede luru atxi kanakelau. Inyõ bedede luruki rariakeki, tiobo rake rieryõhyyre. <sup>36</sup>Waloosòna atxiteriule, biwatyhynyke waloosònamy, taile waloosòna mahãduõmy boibeke. Kiarybe rahu-di tahe Jesuisi iribi rexitamy rexiwore. <sup>37</sup>Tii sõwemy bededeõtidỹỹna ikoreny-txi riwinyre. Ihãrele tahe sõwemy rityhynyõre. <sup>38</sup>Kia tahe Isaia tyyriti-ki roire, tahe iwesele tuu rarybere wese wiji rỹira rotỹỹnyre:

—Wanyrỹ, Iny rybe tỹnydỹỹnareny tiiboho rityhynyõhyyre, Deuxu taruru tamy riteòsinyrehãrele rityhynyõre.

<sup>39</sup>Tai rityhynyõhyyre. Isaia, Deuxu rybedu ijõmy ròritidỹỹre:

<sup>40</sup>—Deuxu riruetànyre, irayky riteredỹỹnyre. Tai rieryõhyymy robiõhyymyhỹre. Tiu heka Deuxu rityhynyõhyyre. Tiu riteytenyõhyyre.

<sup>41</sup>Isaia Jesuisi loosònamy robire. Tai tahe tuu ròritidỹỹre. <sup>42</sup>Ihãrele tahe dohodỹỹna mahãdu wedule sõwemy rityhynyre. Urile fariseu mahãdu òrarukile, ijõ-ò tuu rarybeõre, dohodỹỹna mahãduy-ribi riòlòdỹỹnyheny. <sup>43</sup>Tiiboho dori Deuxu wowydyna luurenyõre inywowydynale luurenyre.

44 —Iny riwatyhynymyhỹkeki, wadeòdỹỹdule rityhynymyhỹre. 45 Inyõ wamy robikeki, iule wadeòdỹỹdumy robike. 46 Jiarỹ loosõna wesemy anade bede-ò. Tai tahe iny riwatyhynykeki, bede luru ribi ròhònyke. Tai heka anade. 47 Inyõ warybe-ò roholake hãrele riywinyõkeki, tahe jiarỹ tii wiji ariywidỹỹnyõke. Jiarỹ dori tarasaduhyylemy anade. 48 Inyõ riwatyhynyõkeki, warybe-ò roholaõkeki, ikonana txuu tahe ywisidỹỹna-ò ralòke, warybe-ò rityhynyõmyhyreki aõhõkỹmy dỹỹnana-ò heka kia ralokre. 49 Jiarỹ ixi rayky-ribi aõkõ rarybemahãre. Wahale rybe wadee riwahinymyhỹre. Kia wesele relyymahãre. 50 Deuxu rybe bede ywina-di diwateònyde umytuedeõna wahidỹỹna kia rare. Kiale heka reeryre.

## 13

1-3 Pascoa worana bedehesi txumy txuu rỹire. Tahe Jesuisi rexieryre ixyby tyby-ò ròðsekremy ihỹre, ibededỹỹnana iòhòmỹ roireki. Tule rexieryre tyby ibutumy tamy riwahinyremy. Tii tyby-ribi nade tule ixybyle tamy rakemy. Txioro roxinau Jesuisi taerydỹỹna mahãdu-wana riroximyhỹreny. Judasi Isariò (Simaõ riòre) taile ratximyhỹ. Juhuu diabo tamy rarybere iruule Jesuisi rityhenykemy. 4 Jesuisi sòwemy taerydỹỹna mahãdu luure. Tai tahe rỹire, tatytyre ludu ritare òsuròna rimyre, idi rexiwetyataare. 5 Hynaro-ò bee ritxiwire taerydỹỹna mahãduwaa risuhokremy tahe òsuròna-di tawetya-ki ihỹmyhỹ-di iwa rirubudỹỹnyre. 6 Tahe Jesuisi rehemynyre Simaõ Pedro-ò, Pedro rarybere:

—Aõkõre kai wawareny suròdòõmyke. <sup>7</sup> Jesuisi rirawyònyre: —Kai heka teeryõte aõherekibo resuhòneri. Ihewo-ribi tahe bierykre. <sup>8</sup> Pedro rarybere: —Aõkõre, wawasuròdòdỹõmy. Jesuisi rirawyònyre: —Arisuhòõkeki wawanahyy aõkõ mabeke. <sup>9</sup> Pedro rarybere: —Wawasohojile aõkõ bisuhokre, wadèbò warati-wana tule wahe. <sup>10</sup> Tahe ritỹnyre Jesuisi; inyõ rõhõre-wana iwale rasuhòke. Iuhe ibutumy tyralemy rỹimyhỹre. Kaiboho yralemy toite. Sohoji tahe aõkõre. <sup>11</sup> Jesuisi tatyhedỹdu rayky rierymyhỹre. Tai tahe rarybera, ibutumy aõkõ tyraremy.

<sup>12</sup> Jesuisi iwasuròdò rexihureu, tatytyre ludu retyynyra roxina-ò ròsere. Tamyreny rỹraxire: —Kaiboho teerytenyte. Aõhebo jiarỹ kia ratỹnyra. <sup>13</sup> Adeereny aritỹnykre. Kaiboho tiwaninitenyte anyrỹmy, aõhe inatyhy? Aerydỹdumy, inatyhy heka jiarỹ rare tahe òbitimy tarybetenyte. <sup>14</sup> Jiarỹ aerydỹdureny anyrỹreny heka awareny resuhore. Tai tahe kaiboho wiwa bisuhòbenykre. <sup>15</sup> Iwese jiarỹ rexideòsinyre wese kaiboho biwinybenyke. <sup>16</sup> Inatyhymy adeereny ararybekre. Deòdu dori tawedu ratyre aõkõ rare. Rybe-ò ijohonadu dori rybedutyhy ratyre aõkõ rare. <sup>17</sup> Kia warybe teerytenyte. Tahe biywinybenykeki bedeòbynatyhy adeereny kanakre. <sup>18</sup> Ibutumy umyreny aõkõ rarybereri jiarỹ araeryreny, aratarenyeki, wahe. Rybe tyriti-ki roire kiamy: —Kia wawana riroximyhỹrele heka riwatyhenykre. Ele elemy tuu rotỹnykre. <sup>19</sup> Wiji rarybereri heka wylemy kia tuu rotỹnykre. Tuu rotỹnykreule, kaiboho bierybenykre òbitimy

raryberé wahe; jiarỹ biwatyhynybenykemy wahe. <sup>20</sup> Inatyhytyhymy ararybekre: —Inyõ adee aditeònykre. Inyõ tii rityhynymy kididykeki, tii riwadymyhỹre. Inyõ kidiwadykeki wadeòdỹỹdu ridymyhỹre, Deuxu rityhynymyhỹre wahe.

<sup>21</sup> Tahe Jesuisi rabadewonihikỹmy ronymyhỹ. Tahe rarybera: —Iny sohojiõ ayreny-ribi riwatyhenykre. <sup>22</sup> Tahe wii riijerijereny. Mokobo rarekremy rõhõtinyreny. <sup>23</sup> Jiarỹ, Joaõ Jesuisi weribi ranywỹhỹ, tii dori sõwemy waluure. <sup>24</sup> Tahe Pedro wadee narybewasidi: —Tamy inihe myỹraxike mobo raremy. <sup>25</sup> Tahe jiarỹ retorunyre: —Wanyrỹ, mowexe ratxireri. <sup>26</sup> Jesuisi rarybere wadee: —Kia orotxu ituudỹỹ tamy ariwahinykrele tiikre. Tahe Jesuisi orotxu yre rituunyre idi tahe Judasi Isariò-ò riwahinyre. Tii Simaõ riòre rare. <sup>27</sup> Tahe Judasi riyre. Iribi tahe Satanasi aõwesele tamy ralore. Jesuisi heka Judasi-ò rarybere: —Aõhebo botỹỹnykre wylemy makre biwinykremy. <sup>28</sup> Tahe riroximy rỹimyhỹ mahãdu rieryõre aõmybo Jesuisi rarybemyhỹ. <sup>29</sup> Judasi Isariò dori nieru hyna yrubudỹỹdu heka rare. Tai tahe rõhõtinyrenyre Jesuisi worana bedehesi aõna aõna riwykemy riteònyre, ada iny aokõdu mahãdu-ò nieruõ riwahinykemy. <sup>30</sup> Judasi orotxu yre riymy rahudi tahe ròhònymy rare bede luru-txi.

<sup>31</sup> Judasi ròhònymy rahudi tahe Jesuisi rarybere: —Wiji tahe Deuxu Riòre Hãbutyhyhykỹ loosònamy iny robimyhỹre taraykywo-ki. Tii heka jiarỹ rare. Deuxu-ò waòraru-ki wowy-dyna riwahinykre. <sup>32</sup> Deuxu loosònamy tahe

waki iny robikeki, Deuxu riwatoosònyreri aõwesele ibutumy iny tuu robike. <sup>33</sup> Waluudu mahãdu wariõre wesemy atximahãtenyete, umywanareny urihimyoõle ararekre, idi tahe arakre. Tahe biwaijebenyhãrele waki mahabenyõtyhy. Iwese judeu mahãdu-ò rarybere wesele adeeremy ararybekre: —Titxibo arakre-ò kaiboho boibenyõke. <sup>34</sup> Bede ywina tỹmyra wese adeeremy ariwahinykre ki-amy wahe: —Wiluurenykemy wahe: —Iwese jiarỹ aluurenyre wese tule kaiboho wiluurenyke. <sup>35</sup> Wiluurenykeki ibutumy iny rieryrenykre kai waerydỹna mahãdumy tate.

<sup>36</sup> Tahe Simaõ Pedro ritỹraxyre: —Wanyrỹ, titxibo kai makre. Jesuisi dirawyõnyde: —Titxibo arakre-ò wiji kaiboho boibenyõke, iribi tahe wahemy bodoikre. <sup>37</sup> Tahe Pedro rarybere: —Wanyrỹ aõherekibo araõkre wiji ahemy waumy kie aõraru-ki ariwahinykemy watxireri. <sup>38</sup> Inatyhymy aõbo aumy biwahinykre waõraru-ki. Inatyhytyhymy ararybekre: —Hãnie hãbu robukõule kai biwatxiõnykre inataõmy.

## 14

<sup>1</sup> Kaiboho bedeoitiidỹrenyõmyke bedewona-ki. Kaiboho Deuxu tetyhynytenyete, tai tahe biwatyhinykre. <sup>2</sup> Wahasỹ-ki sõwemy sỹỹ rỹimyhỹre kialemyre heka tai. Kaweseõkeki adee inatyhymy rarybemahãre. Jiarỹ tahe arakre sỹỹ adeeremy ariwinykemy. <sup>3</sup> Ariwinymy arahudi tahe ixbyle aõrysmy adõõsekre. Tahe aradyrenykre titxibo-txi aratxireriò kaiboho tule matxibenykre. <sup>4</sup> Kaiboho dori teerytenyete titxibo wasỹry roire. <sup>5</sup> Tahe Tome rarybere

tamy: —Wanyrỹ, titxibo makreò reerykõrenyre. Tai tahe timykibo asỹry reeryrenykemy. <sup>6</sup> Jesuisi dirawyònyde: —Jiarỹ wa ryy rare. Deuxu inatyhyna jiarỹ rare. Umytuedeõna wahidỹỹdu jiarỹ rare. Inyõ waòrarukile Waha dee rakre. <sup>7</sup> Kaiboho tiwaerytenyte-wana tule Waha teerytenyte. Wiji tyhyule Deuxu teerytenyte, tuu tabitenyte. <sup>8</sup> Idi Filipi rarybere: —Wanyrỹ, boo inydee biteòsinyke, tai tahe awike. <sup>9</sup> Tahe Jesuisi rarybere: —Filipi, sõwemy bededỹỹnana umy-wana rewyre. Ihãrele tahe tiwaeryõte. Inyõ wadee kanakeki, Wahamy robike. Aõherekibo wadee tarybeta boo wadee biteòsinykemy. <sup>10</sup> Jiarỹ Waha-ki watxiwãhãre tule Waha waki ihỹre. Kia aõbohe tetyhynyõte rarybewãhãre, kia iximy aõkõ rarybewãhãre. Waha waki ratximyhy tii taõmydỹỹnanamy rotỹỹnyre waummy-ribi. <sup>11</sup> Waha-ki watxiwãhãre, tule tii waki ihỹre, kia bityhynybenyke. Aõwiihikỹ rewinywãhãre òraru-ki biwatyhynybenyke. <sup>12</sup> Inatyhytyhymy adee ararybekre: —Inyõ riwatyhynykeki, wawesele aõwiihikỹ riwinykre. Tahe watyreleaõ riwinykre. Jiarỹ dori Waha-ò arakre. <sup>13</sup> Tai wanimy aõmy bexitòenybenykeki, tii tahe ariwinykre. Iny Waha-ò wowydyna riwahinykemy idi watxireri, iRiòre wahe jiarỹ rare. <sup>14</sup> Tai aõma wani-ò bexitòenybenykeki, tii tahe riwinykreadeereny. <sup>15</sup> Inyõ waluukeki tii wabede ywina riywinytyhyke. <sup>16</sup> Waha-ò arexitòenykre ijõ wiòhedỹỹdu adeereny kiditeònykremy waderòwmy. Tii aõu aõu adeereny hyyle rarekre. <sup>17</sup> Tii Deuxu Tyytybytyhy rare. Tii

inatyhynamy rieryrenyre, iny bede bede mahãdu wahe. Deuxu Tyytybytyhy ixidee ridykemy. Tuu dori robiõtyhy rieryõtyhy. Kaiboho tahe teerytenyte. Tii dori umywanareny ratximyhÿre, aworeny-ki ratxikremy. <sup>18</sup> Jiarÿ heka ixisohojimy ararisidÿÿnyõtyhy. Jiarÿle adee adoosekre. <sup>19</sup> Wijile arurumy arakre bede-ribi. Bede bede mahãdu tiu wamy robiõtyhy. Kaiboho tahe wamy bobilebenykre, jiarÿ dori ixityre rubu-ribi adexixamy ararekre. Tai tahe tule kaiboho rubu-ribi bexixamy boibekre. <sup>20</sup> Kia txuu kaiboho bierybenykre jiarÿ heka Waha-ki watxiwãhãremy. Kaiboho tasÿ waki ahãtenyte. Jiarÿ tule akireny watxiwãhãre. <sup>21</sup> Inyõ wabede ywinareny dikeki tahe, riywinykeki, waluudu rare. Waha tule iluukre. Jiarÿ tule iluutyhyre. Tamy tule arexideòsinykre. <sup>22</sup> Judasi tamy rarybere: (aõ Isariò aõkõ kÿny, iwitxiraõ.) —Wanyrÿ, aõhekremybo wadeeremy bedexideòsinykre tahe bede bede ludu mahãdu-ò aõkõ wahe. <sup>23</sup> Jesuisi rarybere: —Inyõ walukeki, wabede ywina riywinytyhyke. Waha, heka iluutyhykre. Jiarÿboho tamy adoidenykre tamysÿmy. <sup>24</sup> Iny waluuõkeki, warybe tiu rityhynyõtyhy. Aõ warybe-di aõkõ heka rarybereri. Waha wadee riwahinyredi heka rarybereri.

<sup>25</sup> Tai arakrekoki tuu rarybereri adeeremy. <sup>26</sup> Tahe Deuxu Tyytybytyhy, awiòhedÿÿdu, tii araerynanykre ibutumy aõna aõnamy. Timybo jiarÿ adeeremy raryberemy akananohõtiijaranydenykre. <sup>27</sup> Ywina adeeremy adiwahinykre waywina wahe. Iwese bede

bede ludu mahãdu riwahinymyhÿre wese aõkõ ariwahinykre. Uritere nohõtiyreõmy brebuõmy. <sup>28</sup> Rarybere dori arakremy tule adoosekremy. Waha waratyre rare. Tamy he arakre. Kaiboho waluukeki, beysabenykre tamy arakreu. <sup>29</sup> Kaa bede reakoki tuu rarybereri. Tuu reakreu tahe, kaiboho biwatyhynybenykre. <sup>30</sup> Sõwemy heka adeereny ararybeõkre, bede dinodu dori tehemyrysÿ iõhõmy ihÿre, Satanasi wahe. Tii heka wadee iruruõhyre, riwateõnyõtyhy. <sup>31</sup> Jiarÿ Waha luure. Rewinywãhãre aõbo Waha ariwinykemy riwateranymyhÿre. Botamanyke: —Ròkòirenyke.

## 15

<sup>1</sup> Hãjutò òwòna wese wihikÿ jiarÿ rare. Waha tahe bede rade wysydÿÿdu wese rare. Bede òbebure iratyõkeki iò riòròke. Iratydikeki iòsõmo iribi risihere. Tai tahe sõwetyhymy nihikÿmy raratynyke. <sup>2</sup> Kaiboho bede rade-ò wesemy toite. Warybe-di aòsõmoreny aribireny resihemahãre. Katahe òbitimy toite bederatymy raratynykemy. <sup>3-4</sup> Kaiboho biwamymy wadi myikre. Iwese bede radeõ raòròomyhÿkeki irulemy rÿikre raratynyke. Aõkõkeki ruruke. Kaiboho iwesele toite. Waki beàrenyõbenymyhÿkeki, tiu Deuxudeewimy atxibenyõtyhy. <sup>5</sup> Jiarÿ hãjutò òwòna wese rare. Kaiboho ibede radeò wese toite. Waki beerenybenykeki, jiarÿ aki ararike, tai bederaty wese sõwemy maratynyke. Wahoõkeki tiu aõ biwinybenyõtyhy. <sup>6</sup> Inyõ waki rariõkeki, iwese iny bede rade rubu-di rahuleke, tii iwesele inyõ rahukre. Juhuu rimyre, idi heòty-ò rehure, tai roomyhÿre. <sup>7</sup> Kaiboho waribi



boibenyõkeki, warybe õhõti-ribi rosaõtyhykeki, aõtaxina wadee bexitõenybenykre, tai ibutumy adee ariwahinykre. <sup>8</sup> Iwese bedede rade sõwemy raratynymyhÿre wese, kaiboho, aõna aõna wiwihikÿ biwinybenyke Deuxu dee. Kiakeki tahe Deuxu dealàna sõwemy ritakre. <sup>9</sup> Iwese Waha waluure wese jiarÿ aluurenyre waluuna-ribi boibenyõke. <sup>10</sup> Wabede ywina inyõ riywinykeki, tii waluuna-ribi raõtyhy. Iwese Waha bedede ywina reywinymyhÿre wese tahe Waha luuna-ribi jiarÿ tiu rahõnyõhyyre. <sup>11</sup> Wadeysana awo-ki ratxikemy jiarÿ adi watxireri. Eysana sõwemy mabekemy adi watxiwãhã. Tai tahe warybe adee rarybere. <sup>12</sup> Wabede ywina heka kaa rare: —Wiluukemy. Iwese jiarÿ aluure wese wiluurenykemy. <sup>13</sup> Inyõ taery dee rurukeki taluunadireki, tii luunatyhy ijõdire. <sup>14</sup> Kaiboho wadeewi biwinybenykewana tai inatyhymy wabiõwa toite. <sup>15</sup> Tahe aõ wadeòdumy aõkõhe araninirenykre. Kaiboho wabiõwa toite jiarÿ dori Waha-ribi raholare adee tuu relyywãhãre. <sup>16</sup> Kaiboho tahe tiwatatenyõhyyte, jiarÿ tahe aratarenyre kaiboho boibenykemy. Sõwemy aõna aõna wiwihikÿ botÿÿnybenyke. Tule kia aõna aõnamy tule roihykemy. Tai tahe aõmy Waha-ribi wani-di bexitõenybenykeki, adee riwahinyhy rareke. <sup>17</sup> Wiluubenyke: —Kia tahe wabede ywina adeereny adiwahinyde. <sup>18</sup> Bede ludu iny mahãdu eramy reakeki myÿ uritere nohõtiõmy juhuhu dori waderamy waluuõre. <sup>19</sup> Kai bedede ludu iny tate-wana iny aluuke, tahe aõkõre. Tai tahe iny eramy reamyhÿre. Bede ludu mahãdu

ribi jiarỹ aratara. Bede ludu mahãdu aõkõ tate urenana. <sup>20</sup> Adee heka rarybere aõmybo. Uritere iribi nohõti lusaõmy kia wahe: —Deòdu tawedu ratyre aõkõ rare. Tai wadee aõbina binamy iny rotỹnymyhỹre. Adeereny tule aõmy rotỹnykremy wahe. Tiiboho warybe riywinyrenykeki, arybe tule tiiboho riywinyrenykre. <sup>21</sup> Kia tahe adee ratỹnymyhỹre wanimy rybe òraru-ki, tiiboho dori wadeòdỹna rieryõreki. <sup>22</sup> Tuu ararybeõre wana inihe tiiboho òrarudiõhyrenyre. Katahe rarybere tai tahe tiiboho rarybeõtyhy rieryõremy. <sup>23</sup> Inyõ waluuõkeki, tule Waha luuõtyhy. <sup>24</sup> Jiarỹ heka ibutuko-ò wowydyna iitxerenarenymy rewinyõrewana, tiiboho iòrarudiõhyre inihe. Tahe rewinyamahãre, tuu robimyhỹrenyre, ihãrele tahe waluuõre tule Waha luuõre. <sup>25</sup> Kiamy heka rotỹnyre bede ywina ritidỹna-ki roireki. Tai heka tuu rotỹnymyhỹre. Kiamy wahe ritidỹna-ki roire:

—Tii heka bede òraru aõkõ rare, ihãrele tahe iluuõrenyre.

<sup>26</sup> Deuxu Tytybytyhy adee ariteònykre. Tii, wiòhedỹdu rarekre inatyhynamy rierynanykre. Tahe, tii kedehemynykreu wamy rarybekre.

<sup>27</sup> Tule kaiboho wamy marybebenykre, wawana hyy ahãtenyteki.

## 16

<sup>1</sup> Kiamy adee rarybemahãre òraruna-txi ixekemy. <sup>2</sup> Tiiboho heka anatakre tohodỹna hetowo-ribi. Kobe, bede dỹnana iòhòmy kadeakreu inyõ anarubunykeki, kia Deuxudeewimy tuu konohõtinykre. Tii Deuxu

wiòhedỹỹdu raremy ixi-di kõnohõtinykre. <sup>3</sup> Tiiboho Waha rieryõhyymyhỹrenyre tule riwaeryõmyhỹre. Tai tahe kiamy adeeremy rotỹỹnymyhỹrenyre. <sup>4</sup> Iu adeeremy aõmydỹỹnana kedehemynykreu, õhõtireny itxi reake timybo adeeremy relyyretxi. Tiu heka tuu rarybeõhyyre, umywanarenyhyy dori wãhãre. <sup>5</sup> Katahe arakre wadeòdỹỹdu-ò. Kaiboho bỹỹraxibenykekõ aõbo tiobo arakre-ò. <sup>6</sup> Kaiboho heka tabedewomy toite kamy rarybereriki. <sup>7</sup> Ihãrele tahe inatyhymy adeeremy ararybekre: —Adeeremy awikre arakreki wahe. Jiarỹ araõkeki awiòhedỹỹdu, Deuxu Tyytybytyhy kanaõkre. Arakeki tahe tii aditeònykre adeeremy. <sup>8</sup> Iu kanakreu, tii inydee kiditeòsinykre irayky binadiremy, iòbitina-di aõkõremy, iòrarunadiremy. Deuxu dori òrarudu riywisidỹỹnykre. <sup>9</sup> Taòraruna ixidee kiditeòsinykre tiiboho riwatyhynyõrenyriki. <sup>10</sup> Tahe ixidee kiditeòsinykre. Jiarỹ iratyre waòbitina direki. Waha-ò dori arakre, wamy bobibenyõtyhykemy. <sup>11</sup> Deuxu ixiywisidỹỹna ixidee kiditeòsinykre kabede dinodu dee rarybere tii rexihukremy. <sup>12</sup> Jiarỹ heka sõwemy adee ararybekemy watxireri, ibutumy tahe isiramy ixidee bohohabenyke. <sup>13</sup> Txiòhe rare. Deuxu Tyytybytyhy kanakreu, inatyhymy adeeremy rarybekre inatyhyna-di ibutumy. Tarybe-di tahe rarybeõkre. Deuxu-ribi aõmybo roholaremy tahe rarybekre. Tule timybo aõna aõna rarekremy kanarybekre. <sup>14</sup> Tii waaõmydỹỹnana adeeremy ritỹnynykre. Tai kidiwatoosònanykre. <sup>15</sup> Ibutumy Wahahõrõ heka wahõrõ rare. Tai heka tuu adeeremy rarybereri waaõmydỹỹnana adeeremy

kiditỹnynykremy. <sup>16</sup> Urihimyò riòre heka waõkre, idi tahe ixityre wamy bobibenykre. <sup>17</sup> Tahe ijõ ierydỹỹna mahãduõ widee rarybere: —Timybo tii rarybere: —Urihimyò iõkremy tii rarybereri, tule ixiryre wamy bobibenykremy. Tule Waha-ò arakre. Timybo heka rieryrenyõhyyre aõmybo rarybera. <sup>18-19</sup> Tiiboho Jesuisi-ò rỹỹraxirenykremy ratxirenyreri. Tahe Jesuisi rierymyhỹre tuu rỹỹraxikre. Tahe Jesuisi tamyreny rỹỹraxire: —Kaimy ixidee tỹỹraxitenyteri. Wananamy waòkesenalemy. <sup>20</sup> Inatyhymy adeeremy ararybekre: —Iny bede mahãdu urile reysakre, kaiboho tahe araeryrenyra urile mahinybenykre, birajuabenykre, mabedewobenykre. Idi tahe kaiboho beysabenykre. <sup>21</sup> Iwese hãwyy ijera iòhòreki, rabedewomyhỹre, taaõhõkỹmydỹỹnana-di rõhõtinyinmyhỹre. Idi tahe reamyhỹre. Iu tahe tõhõti rosamyhỹre tohouã tỹmyradile reysamyhỹre. <sup>22</sup> Iwesele kaiboho mabedewobenykre, ixityre wamy bobebenykreu tahe, kaiboho beysabenykre. Inyõ heka deysana aribireny ritaõtyhy. <sup>23</sup> Kiatxu tahe uritere watỹỹraxidỹỹõmykre inatyhymy adeeremy rarybereri. Waha-ribi aõmy bexitòenybenykeki. Tii adeeremy kidiwahinykre wani òraru-ki. <sup>24</sup> Tiu heka aõmy textitòenytenyõmahãte wani-di. Bexitòenybenyke, tai bitabenykre. Tai tahe kaiboho beysabenykre.

<sup>25</sup> Ibutumy rybewòtemy adeeremy rarybewãhãre wahe. Idi tahe tuu adeeremy ararybeõkre. Idi tahe itỹnytyhymy Waha aritỹnynykre adeeremy.

<sup>26</sup> Kiatxu tahe bexitòenybenykre wani-di jiarỹ

ararybeõkre umyreny Waha-ò. <sup>27</sup> Waha dori aluurenyre, kaiboho waluurenyreki, Deuxu-ribi anade tetyhynytenyteki. <sup>28</sup> Waha-ribi anade, bede-ò adehemynyde ihãrele bede-ribi arakremy Waha-ò. <sup>29</sup> Jesuisi ierydỹna mahãdu rarybere: —Wiji tahe itỹnytyhymy tarybeteri. Rybewòte-di aõkõ tarybeteri. <sup>30</sup> Kai ibutumy teeryte. Inyõ dỹraxiõmy adee. Kai inatyhymy Deuxu-di tanate. Kia jiarỹboho retyhynyrenyre. <sup>31</sup> Tahe Jesuisi tamy rỹraxire. Inatyhymy wijityhyle tetyhynytenyta. <sup>32</sup> Wabededỹnanamy heka reara. Kaibohoõ sohoji sohojimy tasỹ tasỹ-ò rakre. Biwaribenykre ixi sohojilemy arỹikre. Tahe ixi-wana aõkõ watxikre, Wahawanale arỹikre. <sup>33</sup> Kaheka aõna aõnamy adeeremy rarybere ywina-di araykyreny-ki boibekre. Bede-ki kaiboho aõhõkỹmy botỹnybenykre. Ihãrele beysabenyke, Jiarỹ heka Deuxu òludu mahãdu-di ròtara.

## 17

<sup>1</sup> Jesuisi rarybemy rahudi tahe retehere biu-ò rarybere: —Waha, wabededỹnanamyhe reara. Ariðre watxiwãhãre. Wowydyna wadee biwahinyke tai tahe adee wowydyna adee ariwahinykre. <sup>2</sup> Kai, Waha, ibutumy wadee ruruna tewahinyta iny deòdỹnamy. Tai umytuedeõna ariwahinykre biu-ò hedu mahãdu-ò. <sup>3</sup> Kia heka umytuedeõna rare: —Deuxu inatyhy tate sohojihyy tate. Tii araeryrenykeki tahe eòdỹna Jesuisi Kristu rieryrenykeki. Kia umytuedeõna rare tamyreny. <sup>4</sup> Aõ aõmysỹdỹnabo wadee tewahinyte, ibutumy adee rewinyre.

Tai heka arawowydynyra kabede-ki. <sup>5</sup> Iu bede rexidelenyre umywanahyy rarewãhã. Sõwemy loosõna nihikỹ-di rawãhãre. Tahe wiji, Waha, kia loosõnale ixityre bidiwahinykre umywanahyymy ararekre. <sup>6</sup> Kai iny mahãduõ wadee tewahinyte bede mahãdu-ribi. Tamyreny umy rarybemahãre. Juhu tiiboho ahõrõ roire. Idi wadee tewahinyte. Tiiboho arybe riywinymyhỹre. <sup>7</sup> Ibutumy waaõmydỹỹna aribi retamahãre. Kia heka wiji tiiboho rieryrenyra ibutumy aribi nade. <sup>8</sup> Aõrybebo wadee tewahinytamy tamy rarybemahãre. Tiiboho rityhynyrenyre, rieryrenyre aribi jiarỹ anade, kai wateõdỹỹdu tate. <sup>9</sup> Iõraru-ki adee rexitõenyre. Tiiboho amahãdu roire. Wadee tewahinyte, bede mahãdu-ò raru-ki aõkõ adee rexitõenyre. <sup>10</sup> Ibutumy wahõrõ, ahõrõ rare. Tule ahõrõ, wahõrõ rare. Tai heka iny mahãdu riwatoosõnanymyhỹre. <sup>11</sup> Jiarỹ adee arakre tai kaki arareõkre. Tiiboho heka kaki rarirenykre. Tiiboho biyrubunykre, Waha, ani õbiti-di biyrubunyke, wadee tewahinyteki. Tai tahe iraykyreny wiwesehyymy roirekre. <sup>12</sup> Tiiboho-wana rarewãhãu ani õraru-ki reyrubunymahãre, wadee tewahinyteki. Timy heka reõnonyõhyyre ijõ, sohojile tahe reõnonyre. Juhuu dori Ritidỹỹna roire ijõ sohojiõ ariõnonykremy. Ihyy tahe reõnonyre, Judasi Isariõ õnodỹỹduhyymy rarekre. <sup>13</sup> Ka tahe arakre arora-ò. Tii heka inyõ rarybemahãre ibutumy wadeysana iworeny-ò ralõmyhỹkemy. <sup>14</sup> Jiarỹ arybe tamyreny rewahinymahãre. Bede mahãdu iny dori terarenyre, tiiboho bede mahãdu

iny aõkõ roireki. Iwese jiarỹ bede ludu hãbu aõkõ rare wese. <sup>15</sup> Bede-ribi tarasamy aõkõ heka adee rexitòenyneri. Urile ibina bina widỹỹ-ribi biyrubunykeny. <sup>16</sup> Tiiboho tahe wiji ijõ bede wixira ludu roire, iwese jiarỹ rare wese, wahe. <sup>17</sup> Arybe-di tiiboho biòbitinyke, tai ahõrõ mahãdumy rarekre. Arybe dori òbitityhy rare. <sup>18</sup> Iwese bede iny-ò tadiwateònyte wesemy, Jiarỹ tiiboho reteònyre bede ludu mahãdu-ò rarybekremy. <sup>19</sup> Tamyreny xiwena wesemy adee arexiwahinykre. Òbitihyymy ararekre, tai tiiboho òbitihyymy roirekremy inatyhyna-di. <sup>20</sup> Aõ tamy sohojile aõkõ heka rexitòenyneri. Ibutumy kia rityhynymy rỹirakre-ò dori rexitòenyneri. <sup>21</sup> Tai tahe ibutumy wiwese wesemy rõhõtinyrenykre. Iwese, Waha, kai waki atxiteri wesemy tule aki watxireri wesemy tiiboho iny-ki roirekre. Tai bede iny mahãdu rityhynykre ateòdỹỹna watxireri urenana. <sup>22</sup> Kai loosõna wadee tadiwahinyte, tahe tamyreny rewahinyre. Tiiboho sohojihyy weselemy roirekremy, iwese iny sohojihyy rare wesemy. <sup>23</sup> Jiarỹ taireny wãhãre, kai waki ahãte. Tai tahe inyboho butuhyymy rokoirekre. Wii riòbitinymyhỹrenykre. Tai bede mahãdu rierykre tadiwateònyteki. Tule wamahãdu luu tate urenana Waha, iwese waluure wese. <sup>24</sup> Waha, titxibo ararekre, tiiboho wawanahyymy roirekre, wamahãdumy wadee tewahinyteki. Tai tiiboho waloosõnamy robikre. Kai dori bede ihokõule waluure, tahe loosõna wadee tewahinyte. <sup>25</sup> Waha òbiti, bede mahãdu araeryõre Jesuisi tahe araeryre. Wamahãdu tule rieryre

tadiwateònyte. <sup>26</sup> Jiarỹ tiiboho reerynanyre ani-di. Ihãre ta arierynanykre. Tai aluuna iwese waki ratxireri wesemy taireny rarekre, tule jiarỹ taireny ararekre.

## 18

<sup>1</sup> Jesuisi rexitòenymy rahudi tahe roirenyre taerydỹna mahãdu-wana Cedrõ beàwe-ribi kowa ijà-ò heka reuròrenyrene, tahe bederaty oworuro-ò rirònyrenyrene. <sup>2</sup> Judasi heka Jesuisi tyhedỹdu heka ibede rieryre, Jesuisi dori taerydỹna mahãdu-di tamy rahyymyhỹre. <sup>3</sup> Tahe Judasi, soldado mahãduõ tadinodu-wana ributunyrene. Fariseu mahãdu-ribi xiwena wedu wahidỹdu-ribi Judasi soldado yrubudỹdu mahãdu rihitxinyrene tule xiwena deòdu mahãduõ rihitxinyrene tii-wana rakremy roirenyrene. Tahe tamy ritehemynyrenyrene tòbòra heòty-wana. <sup>4</sup> Jesuisi rexieryrene ibutumy aõmybo tamy kodotỹnykre. Tahe iny mahãdu-ò rexidorunyrene. Tahe rỹraxire tamy: —Mowe teijetyteri. <sup>5</sup> Tahe dirawyònyde: —Jesuisi Nazare hãwã ludu reijereri. Tahe Jesuisi rarybere: —Jiarỹ wa tiile rare. Tahe Judasi ityhedỹdu tii mahãdu wanale nade. <sup>6</sup> Jesuisi tamyreny rarybereu, tahe rexilòhòrarienyrene iribi, tahe suòle reserenyrene. <sup>7</sup> Ixityrene Jesuisi tamy rỹraxire: —Mowe teijeteri. <sup>8</sup> —Jesuisi Nazare hãwã ludu, tiiboho dirawyònyde. —Rarybera tahe jiarỹ raremy wahe. Tiwajeteri-wana tahe biwadyke urile ixinamy wajoi rirahuke. <sup>9</sup> Kawesemy wahe irybe hitxina wadee tewahinyteõ heka tiu reõnonyõhywãhãre. Jesuisi, kiamy rarybere tamyreny irybe hitxina wesemy ibutumy tuu



rotỹỹnykremy. <sup>10</sup> Tahe Pedro tamaydese ritamy reare tahe xiwena wedu deòdu riwotõmonyre. Malòò heka inire. Pedro Malòò nohõti riorore ruruwe-ribi ludu wahe. <sup>11</sup> Jesuisi rarybere Pedro-ò: —Amaydese birutyke. Jiarỹ Waha deewimy aõhebo arotỹỹnykrekõ aõbo wadi tahõtinyteri. Aõhõkỹmy arotỹỹnyõkemy aõbo wadi tahõtinyteri.

<sup>12</sup> Tahe soldadu, tadinodu-wana, judeu yrubudỹỹdu-wana Jesuisi rimyre ritaataamy ridyre. <sup>13</sup> Kia beòra Kaifa xiwena wedu tyhy rare. Anasi iriòre labie rare. Tai tahe juhoo Ana-ò ridyre. <sup>14</sup> Kaifa tahe juhoo judeu mahãdu-ò rarybere: —Wiji beòramy hãbuõ iny mahãdu òraru-ki rurukremy rahõtinyteri.

<sup>15</sup> Simaõ Pedro inyõ-wana rare Jesuisi hewomy. Kia Pedro-wana rare, kia xiwena wedutyhy eryna rare. Tai tahe ralore òtity ijòrore-di. <sup>16</sup> Pedro tahe ahanakile rỹire. Kia Pedro-wana rare. Rohonyre hetowo-ribi hetoijò-di itxeredu-ò rarybere, tahe Pedro ridyre hetowo-ò. <sup>17</sup> Kia ijadòma, heto ijò-di itxeredu rarybere Pedro-ò: —Kai Jesuisi erydỹkỹna mahãdunokõ anobo tate. Tahe Pedro dirawyònyde: —Aõkõre. <sup>18</sup> Tahe soldado yrubudỹỹdu tai rahetòmy rỹimyhỹ, heto ludu deòdu mahãdu-wana txutàtà riki. Pedro iyrenyikile rỹimyhỹ rahetòmy.

<sup>19</sup> Tahe xiwena wedu tahe Jesuisi-ò rỹỹraxire. Aõhebohe aerydỹỹna mahãdu-wana tadotỹỹnymahãte. Timybohe tebedeerynymahãte. <sup>20</sup> Tahe Jesuisi ritỹnyre: —Ibutumy inyko relymahãre iwasimy aõkõ heka relymahãre. Judeu dohodỹỹna hetokile relymahãre Deuxu

dohodỹna heto-wana. Titxibo judeu mahãdu ributunymyhỹremy relyywãhãre. <sup>21</sup> Tai aõherekibo wadeele tỹraxteri. Myỹraxike wadee ijohonadu-ò. Tiiboho ka rieryrenyre aõmybo rarybere. <sup>22</sup> Jesuisi kia rarybereu, soldadu itxereduõ rihetenyre. Tahe rarybere: —Tu heka rybeõmyke xiwena wedutyhy-ò. <sup>23</sup> Jesuisi dirawyõnyde: —Jiarỹ ibinamy aõmybo rarybera-wana, manarybeke tuu. Aõkõkeki, awimy rarybera-wana aõherekibo tiwahetenyte. <sup>24</sup> Anasi tahe Jesuisi ridykemy riteõnyre tataanadihyyle Kaifa-ò, xiwena wedutyhy wahe.

<sup>25</sup> Kowa tahe Simaõ Pedro ratximyhỹre rahetõmy rỹimyhỹ. Inyõ rỹraxteri: —Kai aõbo ierydỹna mahãduõ tate. Tahe rexitxiõnyre. Jiarỹ ijõ aõkõ rare. <sup>26</sup> Xiwena wedu deõduõ Pedro-ò rỹraxteri: —Tii heka Pedro ritõhõtiorore ijiõ rare. Tahe tamy rarybere: —Umy taheka rabire tii-wana bederaty oworuro-ki atximahã-ò. <sup>27</sup> Pedro ixityre rexitxiõnyre. Aõwesele tahe hãnie hãbu robure.

<sup>28</sup> Idi tahe Kaifa heto-ribi Jesuisi ridyrenyre ywisidỹna-ò bede dinodu heto-ò rudiulere. Tiiboho rirõnyõhyre brebuna-di rexisunyrenyheny. Rirõnyrenykeki, tahe Pascoa worana bedehesi rỹsãnaõ rirỹsõtyhy. Tiiboho dori rõhõtinyre rirõnykeki, brebuna raremy. <sup>29</sup> Tahe Pilato rõtõnyre tamy rarybekremy: —Tahe Jesusimy tamy rỹraxteri kia hãbumy terajuatenyteri aõhebohe rotỹnyra. <sup>30</sup> Tahe dirawyõnyde: —Aõbibina binamy rotỹnykõhyra wana inihe aridyrenyõhyreri. <sup>31</sup> Tahe Pilato rirawyõnyre:

—Bidyke abede ywina rybe-di biywinyke. Tahe judeu mahãdu rarybere: —Wabede ywina rybe warubudỹmy rybe aõkõ rare. Inyõ heka arirubunyrenyõtyhy. <sup>32</sup> Kia rybe tahe Jesuisi rybe wesemy rare. Tii dori iximy rarybere timybo rurukremy. Tai timybo irybe hitxina wesemy raryberemy ibutumy rarekre.

<sup>33</sup> Ixityre Pilato ralore ywisidỹna-ò Jesuisi-ò rỹrãxire: —Kai aõbo judeu mahãdu Iòlò tate. <sup>34</sup> Jesuisi ritỹrãxinyre: —Yrãxina aõbo ahõrõ rare ada ijõ aõbo wamy kia rarybere. <sup>35</sup> Tahe Pilato rarybere: —Jiarỹ wa judeu mahãdu aõkõ wãhãre. Aõbinatyhymy aõbo he tewinyte. Judeu mahãdu wadee tiwadyte. <sup>36</sup> Jesuisi dirawyõnyde: —Waiòlõna hãwã bedede ludu aõkõ rare. Waiòlõna kaki ratxikeki wamahãdu wadee raaõbinanyke. Tai tahe judeu mahãdu-ò riwawahinykemy aõkõ watxiwãhãre. Tahe aõkõre kabede ludu aõkõ Waiòlõna rare. <sup>37</sup> Pilato tahe rarybere: —Kai aõbo inatyhy iòlõmy tate. Tahe Jesuisi dirawyõnyde: —Kai ka wamy tarybeta. Kia-ò uludumy anade. Kia-ò anade, inatyhynamy arelyykemy. Inyõ inatyhynamy luukeki warybe-ò roholamyhỹre. <sup>38</sup> Tahe Pilato rỹrãxire: —Aõbo inatyhyna rare. Ta rybe rahudi tahe judeu mahãdu-ò rarybekemy rare. Tiu kỹny kahãbu-ki aõ ibinamy tai rahaõhyra. <sup>39</sup> Inyõ ariteõnykemy watxireri kaibohe wadi tõhõtinyhytentyteri ka woranabedehesi-ki. Tahe judeu Iòlò aõbohe ka ribi ariteõnykre ywi-hyyle. <sup>40</sup> Tahe ixityre ibutumy ryryrenyde: —Kia hãbu aõkõre, Baraba biteõnyke (Baraba heka hãbu debore wasidu rare.)

# 19

<sup>1</sup> Idi tahe Pilato Jesusimy rerotiyhyta-di raòhòtekremy soldado mahãdu riteranyre. <sup>2</sup> Soldado mahãdu edehékỹ rataanadile ira-ò ritidire, iumy tahe tylỹrehekỹ-di rityynyre iòlòtyywesekemy. <sup>3</sup> Tamy rehemynymyhỹre: — Aõherebo iòlòtyhy wesena, tahe rihetenyrenyrene. <sup>4</sup> Pilato tahe ixityre ròhònymy iny-ò rarybekemy: —Ixityresỹ adeereny redyreri. Bierybenyke. Aõ heka tai ibinaõhyummy idi retehewãhãre. <sup>5</sup> Tahe Jesuisi ròhònnyre ede rataana-di tylỹrehekỹ-di. Tahe Pilato tamy rarybere: —Kakỹnyhe tiire. <sup>6</sup> Tahe xiwena wedu mahãdu, yrubudỹydu mahãdu tuu robireu, ryryrenyrene birubunybenyke, itxeò dee bitamadỹỹnyke. Pilato rarybere: —Kaibohole itxeò-di bitamadỹỹnybenyke. Jiarỹ tahe tai ibinamy aõki rahaõhyymahãre. <sup>7</sup> Tahe judeu mahãdu rarybere: —Jiarỹboho kỹny wabede ywina renydire. Rurukemy heka tuu bede ywina roireri, tii dori Deuxu Riòremy rexininimyhỹre. <sup>8</sup> Pilato kia-ò roholareu tahe, ruberutyhyre. <sup>9</sup> Ixityre ralore ywysidỹỹna heto-ò: —Rarybere Jesuisi-ò, tiribi wexe tanate. Jesuisi rirawyònyõhyre. <sup>10</sup> Tahe Pilato rarybere: —Bidiwarawyònyõkre aõbo. Jiarỹ warurudire anarubunyke aõbo ada arateònyke aõbo. <sup>11</sup> Jesuisi rirawyònyre: —Aruru-di aõkõ tate. Deuxu kidiwahinykekile tahe biwateònyke ada biwarubunyke. Tai tahe adee wawahidỹỹdu aratyre iòraru dire. <sup>12</sup> Tai tahe Pilato iteòdỹỹmy rurure. Tahe judeu mahãdu tamy ryryre: —Kai biteònykeki tahe,

Iòlò Cesar biòwa aõkõ tate. <sup>13</sup> Kiarybe-ò Pilato roholareu tahe, Jesuisi diòlòdỹnyde ahana-ò. Pilato tahe ywisidỹna ryna-ò rexisỹnyre. Kia ubeni heka Rirana Ijãti inire. Tahe judeu rybe-ki heka Kabata inire. <sup>14</sup> Pascoa worana bedehesitxu sexta feira rỹire. Txutye iòhòmy tahe bede rỹire. Tahe Pilato rarybere judeu mahãdu-ò: —Betehebenyke aiòlòreny-ò. <sup>15</sup> Tahe tiiboho ryryreny. Bidybenyke! Itxeònihikỹ-ò birubunybenyke. Pilato tahe tamy rarybere: —Aiòlò aõbo, birubunybeny. Tahe xiwena wedu rirawyònyre: —Iny iòlòreny sohojile wa rare: —Cesar heka inire. <sup>16</sup> Tahe Pilato Jesuisi tamyreny riwahinyre rirubunyrenykemy.

<sup>17</sup> Tiiboho heka Jesuisi ridyreny. Iitxeò tamy riwahinyre idi retyykremy. Tahe Kalvariu-ò idi ridymy rare. Kalvariu heka Kòkòta inire judeu rybe-ki. <sup>18</sup> Tai itxeò nihikỹ dee ritamadỹnyre ijõ hãbu inatxiõ-wana Jesuisi itxeònihikỹ itya-ki rỹire. Hãbu wiò wiòmy idi rỹire. <sup>19</sup> Pilato riritinyre ritidỹna-ò Jesuisi tyre-ò ritidire. Kawesemy ritidỹna roire: —JESUISI, NAZARE HÃWÃ LUDU, JUDEU MAHÃDU IÒLÒ. <sup>20</sup> Hãwã-ribi ireheriòremy roire. Tai tahe sòwemy judeu mahãdu tuu robire iritidỹnamy. Inataõ rybemy witxira riti heka inataõmy roire. Judeu rybe ijõre, latim rybe ijõre, grego rybe ijõre. <sup>21</sup> Judeu xiwena wedu mahãdu Pilato-ò rarybere: —Judeu mahãdu Iòlò rarybere: —Iritidỹõmyke wa. Kawesemy biritinyke: —Tii rarybere judeu mahãdu Iòlò raremy. <sup>22</sup> Tahe Pilato dirawyònyde: —Iwese reritinyre wesemy rarehykre.

<sup>23</sup> Soldado Jesuisi itxeònihikỹ-ò ritamadỹỹnyny rahudi tahe, ityy ritxuatxuakremy diwyde. Inaubiòwa heka riywinyra. Wirarea riwykremy soldado mahãdu idi rỹireri. Iyhyitxena tahe iretydyna-di aõkõ rare. <sup>24</sup> Tahe ijõ widee rarybere: —Iyreyredỹỹrenyõmyke wa urile ta idi rikihurenykre mobo ritakremy. Kia ryberiti-ki tuhyy roire:

—Watyy ritxuatxuaire ijõ yre wimy riywinyrenyre. Tule wayhyitxena tyre-ki rehurenyre mobo ritakremy. Tahe iwese Tyyriti rarybere wese, soldadu mahãdu ibutumy aõhebo risỹnyre.

<sup>25</sup> Inaubiòwa hãwyy retehemy rỹimyhỹ Jesuisi itxeònihikỹ iòhòmy. Jesuisise taseriòre-wana, Marie Madalena ijõre, Klopa hãwyy ijõre. <sup>26</sup> Jesuisi tadimy robireu, Joaõ, taerydỹỹna luunadu bire-ki, tahe rarybere: —Nadi beteheke wa kowa ariòre rare. <sup>27</sup> Tahe Joaõ-ò rarybere: —Kaa adi rare. Ierydỹỹna Joaõ tahe ridyre taheto-ò tai rasỹnykemy.

<sup>28</sup> Jesuisi tahe rieryre ibutumy rexihuramy tahe rarybere: —Ariõkemy watzireri. Kaimy heka rarybere aõbo Ritidỹỹna-ki roire riwinykemy. <sup>29</sup> Tai tahe vỹi mona silỹnyhỹkỹ-ki raharenyre. Tahe Jesuisi-ò iwereheni wese-ò rituunyny idi riteònyre iry-ò teòdimy. <sup>30</sup> Jesuisi tuu riòre idi tahe rarybere: —Ibutumy Waha aõmysỹdỹỹna rexihumy roire. Tahe ròtiòròmý resere iule ta rurure.

<sup>31</sup> Kia sabadotxu heka worana bedehesitxu nihikỹõ rare, brebuna rare. Tai tahe hãbu rubu itxeò-ki ririkõkemy tuu rarybemyhỹre. Tai Pi-

lato-ò judeu mahãdu rexitòenyre hãbuti riòròmy riteònykemy, itxeò-ribi ritakemy. <sup>32</sup> Tahe soldado mahãdu hãbuti wiòle riorore. <sup>33</sup> Jesuisi tahe rummy roireki iti riòròõre. <sup>34</sup> Soldadoõ tahe Jesuisi-ki rojyre iweki tahe hãlubule rohonyre bewana. <sup>35</sup> Kia tuu rabire tahe òbitimy tuu jiarỹ rarybere, Joaõ wahe. Waritidỹna inatyhy raremy, reeryre. Kaiboho bityhynybenykemy, adireny watxireri. <sup>36</sup> Kaheka ibutumy iritina hetxina tuu rarybere heka ibutumy tuu rotỹre. Kia wesemy roire: — Iti riòròõkre, sohoji aõkõ. <sup>37</sup> Ijõ iritinaõ kawesemy roire:

—Rirorenykre tõnori-di idi reteherenykre tamy.

<sup>38</sup> Jyje heka Arimatea hãwã luduõ rare. Idi tahe tii Pilato-ò rexitòenyre Jesuisi umymy rituunykremy. Tii heka Jesuisi heluduõ rare. Judeu mahãdu lau ruberumyhy tai Pilato-ò rare wasimy. <sup>39</sup> Pilato tahe awiremy rarybere. Tahe Jesuisi umy riwyre. Nikodema tule rare Jyje-wana. Tii juhule rummy Jesuisi-wana widee raryberele rare. Tii òwòrutyby òwòruòbru-wana aderòna wesemy diwyde sòwemy, 45 urihixinamy riutxienanyre. <sup>40</sup> Tahe Jesuisi umy tyky jurarehe-wana ritỹtenyre aderòna wanahyyle. Kawesemy dori judeu mahãdu iny rituunymyhyre. <sup>41</sup> Itxeòalamana-ribi bederaty oworu iòhòmy roire. Ityi-ki tahe wabede tamyra roire. Mana hãloo rỹire tai heka moo rawabedenyõhyre. <sup>42</sup> Tai tahe rawabedenyre iòhòreki, tule judeu worana bedehesina txummy roireki.

## 20

<sup>1</sup> Semana juhu ludu txu Marie Madalena rehe-

mynyre wabede-ò, rudile wahe. Mana ijòtòbòna iraylemy rỹiremy idi retehere. <sup>2</sup> Tahe raijaranyre Simaõ Pedro-ò, ijõ Jesuisi luunaduõ wahe, Joaõ-ò, jiarỹle wahe. Tahe wadeereny rarybere: — Wahĩ tahe hãlokwoku-ribi ritakarenra. Titx-ibo ritidira, rekerykõre. <sup>3</sup> Pedro tahe ròhònyre, Joaõ-wana wabede-ò roire. <sup>4</sup> Wiwana raijaranyre tahe jiarỹ Pedro ratyre raijaranyre tamy. Jiarỹle heka juhu tamy rehemynyre. <sup>5</sup> Tahe rawebesere iwo-ò itxeremy. Irahanalemy rabire. Ta ralòõhyyre tamy. <sup>6</sup> Idi Pedro rehemynyre ralore tamy. Tule irahanamy robire. <sup>7</sup> Jesuisi rati rasirahana rihitxinymy roire ixivanale. <sup>8</sup> Tahe jiarỹ juhu rehemynyre tahe Pedro hewomy ralore. Tuu robire, retyhynyre. <sup>9</sup> Tiibocho dori ritina rieryrenyre ihãre tahe rierytyhykõlerenyre. Jesuisi rubu-ribi rexiixixanykemy ritina roire. Tii tahe rierytyhykõlerenyre. Tahe wiji rieryrenra. <sup>10</sup> Tahe ixyby raòkeserenyre inyhetoreny-ò.

<sup>11-12</sup> Marie tahe robumy wabede-ribi iòhòmny rỹire. Rawebesere tahe wabedewo-ò itxeremy. Inatxi ÿjumy robire iwo-ki itykyuramy roimyhỹ. Ijõ heka rỹmy rononymhỹ Jesuisi ratiherina tyre-ki. Ijõ tahe iwaherina-ki rononymhỹ. Jesuisi umy tahe iõre. <sup>13</sup> Tahe ÿju Marie-ò rỹỹraxire: —Hãwyy, aõherekibo tabureri. Rirawyònyre: —Wahĩ kumy dokuri riwymy ramyhỹre. Rekerykõre titxibo ritidira. <sup>14</sup> Iu rarybereu tahe tahewoòle roosere. Jesuisimy robire rỹimyhỹò. Tii heka rieryõhyymhỹ tii Jesuisi raremy. <sup>15</sup> Tahe Jesuisi rỹỹraxire: —Hãwyy aõmybo tabuteri, mobo teijeteri. Bederaty oworu ywidỹỹdu raremy heka tii rõhõtinyre:



—Tahe dirawyònyde: —Wahĩ, kai anobo karibi tetakata-wana wakoku tuu belykyke. Tahe jikarỹ karikorykremy. <sup>16</sup> Tahe Jesuisi tamy ryrre: —Marie! Marie rokesemy reare riijemy: —Wahĩ, erydỹkỹdu! (Tii hebraika rybe tuu rarybere: —Raboni, wahe.) <sup>17</sup> Jesuisi rarybere tamy: —Waroorehedỹõmyke wa. Waha-ò dori raõlemy wãhãre tahe arakre. Kai tyhydỹỹdu seriðre-ò makre tamy rybemy. Jesuisi rarybere kawesemy: —Arakre inytybyreny-ò, iny Deuxureny-ò. <sup>18</sup> Idi tahe rarybere erydỹỹna mahãdu-ò Wanyrỹmy rabira. Marie Madalena relyyre timybo raryberamy.

<sup>19</sup> Semana juhu ludu txuu, txioromy heka Jesuisi erydỹỹna mahãdu wii ributunymy rỹimyhỹ hetowoõ-ki. Ibutumy ijò ritòbòtòbònyra judeu mahãdu lau brebumy. Jesuisi tahe nade iyreny-ò rexitỹnyre. Rarybere: —Ywina araykywo-ki atxikemy idi watzireri. <sup>20</sup> Kia rarybereu tahe tebò rurena riteòsinyre, tawerurena tule riteòsinyre tamy. Iule tahe reysarenre Jesusimy robireki wahe. <sup>21</sup> Ixyby tamy Jesuisi rarybere: —Ywina araykywo-ki rarekemy idi watzireri. Iwese Waha diwateònyde wese tule arateònykre. <sup>22</sup> Iu tahe ribunymy rarybere: —Deuxu Tyytybytyhy teta-teri. <sup>23</sup> Inyòrarunaõ biixãwididỹỹnykeki tule kia òraruna ariixãwidinyke. Tule aõkõkeki, ijõ òraruna biixãwididỹỹnyõkeki, kia tule ariixãwididỹỹnyõke.

<sup>24</sup> Tome (Inatxina iniõre) tii waòinatxi reurò mahãduõ rare, tahe tairenyõre heka Jesuisi nadeu. <sup>25</sup> Jesuisi erydỹỹnaõ rarybere: —Wanyrỹmy rabirenyra. Tahe Tome tamyreny rarybere: —Retyhynyõre kỹnyhe.

26 Semana sohoji bededỹỹnanamy idi rỹire, ixyby wii ributunyre Jesuisi erydỹỹna mahãdu. Iu tahe Tome tii mahãdu-wana ratximyhỹ. Ijò ritòbòtòbònymy rỹimyhỹ. Tahe Jesuisi nade iyreny-ò. Tamyreny rarybere: —Ywina-di araykywo-ki atxikemy idi watxireri. 27 Tahe Jesuisi Tome-ò rarybere: —Betehe inihe wadebòrurena-ò ebò inihe tamy bidadidike. Tule wawerurena-ò ebò bidadidike. Itxiòdỹỹõmyke wa, bityhynyke. 28 Tome tai dirawyònyde: —Wanyrỹ, waDeuxu. 29 Tahe Jesuisi rarybere: —Tome, kai aõbo biwatyhynykre wamy tabiterikile. Sõwemy deysana inyõ kanakemy wãhãre tiiboho dori wamy robiõre hãrele riwatyhynyrenyre.

30 Jesuisi heka sõwemy aõwiwihikỹbo riwinyre. Ierydỹỹna mahãdu heka kia aõmybo robire. Kia aõmydỹỹnana heka ihoõre kaki iritina-ki. 31 Kaa ritidỹỹna reritinyre Jesuisi Kristumy rare. Deuxu deòdỹỹna rare. Kia bityhynybenykemy wahe, Deuxu Riòre wahe tetyhynyteri-wana tahe umytuedeõna bitakre, ini òraru-ki wahe.

## 21

1 Iribi tahe Jesuisi rexitỹnynyre Tiberiade ahohokỹ ijà-ki. Kia wesemyre heka. 2 Ibutumy heka juhu rỹimyhỹ: —Simaõ Pedro, Tome Didimo iniõre, Natanaeli. Tii Kana hãwã ludu rare, Kalileia bedeki. Zebedeu riòreboho ijõre, inatxi Jesuisi ierydỹỹnaõ ijõre. Rarekie. 3 Tahe Simaõ Pedro rarybere tamyreny: —Rià teredỹỹmy arakre. Imahãdu rarybere: —Jiarỹboho aroirenykre ahemy. Tahe roirenyre hãwò-di. Aõhomy aõkõ ruu idireny nade. 4 Tahe

bede ratỹnyrau heki Jesuisi ŷnyrakile ratximyhỹ. Ierydỹna mahãdu tahe rieryõhyymyhỹre. <sup>5</sup> Jesuisi ryryre tamyreny rỹrãxire: —Ijoi moõ rokoreny. Utura aõbo temytenyta? Rirawyõnyre: —Aõkõre wa. <sup>6</sup> Kaiboho biterebenyke rurunawe-ribi taita bimybennykre. Tahe riterenyre sõwemy rautxienyire iriã heka ritusinyõhyymyhỹrenyire utura sõwereki. <sup>7</sup> Kia ierydỹnaõ Jesuisi luunaduõ rare jiarỹ, Joaõ wahe. Jiarỹ tahe Pedro-ò rarybere: —Inynyrỹle wa rare. Pedro Jesuisi raramy roholareu, tatyky tawetyamy ritaamy tamy resere, tade hekỹlemy rareki. Tahe resere bera-txi tamy rakremy. <sup>8</sup> Ijoi mahãdu riã-di narurunymy nade utura sõwereki. Tahe 100 urihixinamy ŷnyra-ribi ratximyhỹreny. <sup>9</sup> ŷnyra-ò rejuxunyreu tahe, robirenyre heõtymy obiurawo-ki. Orotxu tule tai rỹire. <sup>10</sup> Jesuisi tamy rarybere: —Uturaõ bidiwybedenyke wiji temytenytaõ. Simaõ Pedro hãwororable riã-di rarurunyire. Sõwemy heka tai utura nihikỹ rỹimyhỹ, 153 wahe. Ihãre tahe riã raòrõõhyre. <sup>11</sup> Tahe Jesuisi rarybere: —Manake hewa biroxibenyke. <sup>12</sup> Ibutumy ierydỹna mahãdu rieryre tii inynyrỹreny raremy. Tai tahe inyõ rỹrãxiõhyre: —Mobo tii raremy. <sup>13</sup> Tahe Jesuisi orotxu rimyre. Tamy riwahinyre. Ixiyrubule utura tamy riwahinyre. <sup>14</sup> Kia tahe ihewotyhyry Jesuisi rexideõsinyre taerydỹna mahãdu-ò, rubu-ribi dexixade hewomy wahe.

<sup>15</sup> Riroximy rahudi tahe Jesuisi Pedro-ò rỹrãxire: —Simaõ, Joaõ riõre, kahãbu mahãdu waluure. Kai tahe iratyre aõbo waluure. Tii rirawyõnyre: —Kai tiwaeryte, aluure. Tahe

Jesuisi rarybere: —Wabudoeni riòre bidiòwenyke. <sup>16</sup> Ixityre rỹraxyre: —Simaõ, Joaõ riòre, kai aõbo waluure. Tahe Pedro rirawyònyre: —Kohe, Wanyrỹ aluure jiarỹ, tiwaeryta. Tahe Jesuisi rarybere: —Bidyke wabudoeni biòwenykemy. <sup>17</sup> Ihewotyhymy tahe Jesuisi rỹraxyre: —Simaõ, Joaõ riòre, kai aõbo waluure. Iu tahe Pedro rabadewomy ronyre, ixityremy rỹraxyreki. Tahe dirawyònyde: —Wanyrỹ, ibutumy teeryte aõna aõna. Aluure heka, tiwaeryta. Tahe Jesuisi rarybere: Wabudoeni biòwenyke. <sup>18</sup> Inatyhymy adee ararybekre. Iu ijoi morõkõmy tatemahãu, ixiwanale texitynymahãte ixidee wimy titxibo tamahãte. Iu tahe mamatuarinykre inywitxira aratyynykre, Ebò biteòsinykre iny arataataanykre tahe inyõ aradykre titxibo noderamý beakreò. <sup>19</sup> Kiamy heka Jesuisi rarybere ritỹnynykremy timybo Pedro rubu-ò rỹikremy. Tai Deuxu riwowydynykre. Idi tahe Jesuisi rarybere: —Biwaheludunýke wa. <sup>20</sup> Tahe Pedro retehere Joaõ Jesuisi hemy rareriò, Joaõ Jesuisi lumy raremyhỹ. Joaõ ihetxiu Jesuisi-ò iòhòmy rỹraxyre jiarỹ wahe: —Mobo iwahisidỹdukremy, ihewo ludu roxina rỹireu. <sup>21</sup> Tahe Pedro Joaõmy robireu, rỹraxyre Jesuisi-ò Joaõmy. Aõbo he tamy rotỹnykre. <sup>22</sup> Tahe Jesuisi rirawyònyre: —Tii rurukõlemy adòòsekemy idi watxikeki, timybo tahõtinyte. Adee tahe biwaheludunýkekile awike. <sup>23</sup> Ierydỹna mahãdu rarybemy raremyhỹ: —Kiamy wahe Joaõ rurukõlemy Jesuisi rarybere. Tahe kiamy aõkõ Jesuisi rarybere. Jesuisi juhuu rarybere: —Tii rurukõle adooskre-wana,

timybo tahõtinytenyteri.

<sup>24</sup> Jiarỹ tahe kia aõmydỹỹnanamy relyymahãre, Joaõ wahe, reritinyamahãre. Inatyhymy kia tuu rare, jiarỹ tuu relyymahãre.

<sup>25</sup> Sõwemy aõmydỹỹnanamy tahe Jesuisi riwinyre. Inyõ ibutumy riritinykeki, iritina heka bede ritỹxinykre tyyriti sõwekre-wana.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 11 Nov 2022 from source files  
dated 29 Jan 2022

55ce0bcd-101e-52a3-984e-847027efe150